

**Páwòlò cu wáràgà ji ndâ mbe kû
kili ta ɾè mî Bìndi-Mbíɾì gbí
gbata
RÓMÀ**

¹ Nìnó a ye tí Páwòlò tí bòò mî Jézù tí Bìndi-Mbíɾì ká nò. Mbíɾì cu 'bì wó mítí ye máa, ye dù tí bòò mî yì; bìndi yí gii bàkà ye tí mbe ma Banga-Ngú-Có tí nó náa yí tí Mbíɾì

² ci ndâ 'duù gítí táánò sàà ta bà tuu ndâ mbe 'dòkò có mî wó ji ndâ 'duù ta có tí nó gbí wáràgà mî wó tí Mbíɾì nò.

³ Banga-Ngú-Có tí nò a có gítí 'Viì mî wó tí Mbíɾì, mbe gí tí 'duù ta ɾèngbó bà jò yí 'do tí Dàvidè tí gbolò gba mî ndâ Ìzìrìyèlì,

⁴ náa à gii ñò wotí mî wó tí 'Viì-mî-Mbíɾì ni mítí bà 'vala ndi wó 'do gbí muu'dú wó, tí Jézù tí Bìndi-Mbíɾì tí Mbe tí ndoo, go có mî tó Bèrì.

⁵ Mbíɾì bàkà nambeè ji ze ta bà tuu ze ji ndâ 'duù á muu to tí nó 'dáá gí, tacó wàa, ndâ 'duù 'dáá gí 'ví dù tí ndâ mbe 'di có, wàa ndú 'ví tee njembí ndú mítí yì tí Mbíɾì ta ɾè mî Jézù tí Bìndi-Mbíɾì.

⁶ ɾè yo tí ndâ 'duù Rómà delè kuu gbí òkò tí ndâ 'duù tí nó náa Mbíɾì tè'é tí ndú, tacó wàa, ndú 'ví dù tí ndâ 'duù mî Jézù tí Bìndi-Mbíɾì nò.

⁷ Ye kû cu wáràgà tí nó ji yo tí ndâ 'duù tí nó 'dáá gí náa Mbíɾì kû zè yo niki maa gbí gbata Rómà, náa Mbíɾì tè'é tí yo tacó bà bàkà yo tí ndâ tó 'duù mî wó nò. Ye kû 'deke tí ye ji Bu ndoo

Mbírì, ye delè kù 'deke tí ye ji Mbe tí ndoo Jézù tí Bìndi-Mbírì, máa, ndú 'ví bàkà nambeè ji yo, ndú delè 'ví si yo 'ví dù nìkì maa.

Páwòlò 'deke tí wó ta bà 'dè nìkì maa ji Mbírì

⁸ Kpédélé có mì ye ji yo éno máa, ye kù 'dè nìkì maa ji Mbírì ta rẹ̀ mì Jézù tí Bìndi-Mbírì tacó tí yo 'dáá gî. Tacó rẹ̀ yo wu ta bà ùnje gítí Mbírì cee muu to tí nó gî.

⁹ Mbírì tí nó náa ye kù bàkà i ji yí ta njembí ye ta bà ma Banga-Ngú-Có mì 'Vii mì wó nó ò ni gî máa, ye ta o 'dáá gî kù 'deke tí ye ji yì tacó tí yo.

¹⁰ Ye kù 'deke tí ye máa, Mbírì má nì 'bâ gî, ye 'ví 'de ta kpokèjì bà ya gí mì yo kà.

¹¹ Go bà ò yo kuu tí ye ngé ndii gî, tacó wàa, ye 'ví 'dè ta ndâ 'bí có ònó mì Mbírì náa à gbí njembí ye nó ji yo, wàa yo 'ví yù tí .

¹² Gbí có tí nó éno máa, bà tee njembí ye mítí Bìndi-Mbírì bà konì yo, bìndi bà tee njembí yo mítí Bìndi-Mbírì delè bà konì ye.

¹³ Go bà 'va gbí tù yo kuu tí ye, ndâ ná'vindí, máa, ye ta o 'dáá gî kù koṛo có bà ya gí mì yo kà; káa nó mì ye ta o 'dáá gî kù zò káa dí. Ye kù jè ta bà ya gí mì yo kà, tacó wàa, ye 'ví 'de ta kpokèjì bà solo nje ndâ 'bí 'duù kà gítí kpokèjì mì yúco, á go ònó náa ye bàkà ta ndi 'bá mì ndâ 'bí ka yo ònó mbe ò dúú kpokèjì bà bàkà nambeè ta Mbírì ni lá nó sàa kùṛo gî ò.

¹⁴ Ye ga wú bà bàkà nèté ndâ Ìgìrìgì ta ndâ 'bí òa tende 'duù mítí miṛi ye gî. Wú bà bàkà nèté ndâ mbe 'di gbí-o ta ndâ mbe ònókó delè kácáa kuu tàkòcò ye.

15 Tacó éno, a go bà ma Banga-Ngú-Có ká kù te ye ya tí gí mì yo kà.

Wotí mì Banga-Ngú-Có

16 Nô ɾo ye gítí Banga-Ngú-Có wálá, tacó Banga-Ngú-Có a wotí mì Mbírì náa yí kù njaanga ta wú 'do tí mìrì ndâ 'duù ñìnó 'dáá mbe kù tee njembí ndú mítí Bìndi-Mbírì nó 'do gbí vò i. Yí kù 'bità bà njaanga wú kpédélé'i a i 'do tí mìrì ndâ Ìzìrìyèlì, bìndi yí bà gii njaanga 'do tí mìrì sè ndâ 'bí ña ndâ 'duù.

17 Banga-Ngú-Có kù túbà bà bàkà ndoo mì Mbírì tí ndâ jáá 'duù mì wó ji ndoo. Bà bàkà ndoo mì Mbírì tí ndâ jáá 'duù mì wó nò kù 'bità tí 'do tí bà tee njembí ndoo mítí Bìndi-Mbírì, nje delè gii gbo ká ta bà tee njembí ndoo mítí Bìndi-Mbírì. Á go có tí nó náa à cu mí gbí wáràgà mì Mbírì máa, «'Duù tí nó jáá nó 'de 'válá 'do gbí bà tee njembí wó mítí Mbírì,» nô.

Ndâ vò i mì ndâ 'duù

18 Mbírì kpónó túbà kpo-tàkòcò mì wó 'do gbírì gítí ndâ 'duù ñìnó ta nèté mì ndú ta yí tí Mbírì wálá nó, gii je ndâ 'duù ñìnó náa ndú me jáá lá, mbe kù 'buuku muu yúcó 'do gbí có mì ndâ vò i mì ndú nó gí.

19 Bà ñò có gítí Mbírì mì ndú ni me kpo có lá, tacó Mbírì túbà ndâ có tí nó ji ndú ngbárángà'i gí.

20 'Do tí o bà suu to tí nó, ndâ ña i tí Mbírì náa ndoo ñò ta ɾo ndoo lá, go ndâ wotí mì wó mbe cee lá, gii je bà dù yí tí Mbírì dúú bà ya tí, ta o 'dáá gí kuu ngbárángà'i kùro ndú, náa ndú kù

ṛò ni mítí ndâ i tí nó náa yí suu ndú nò. À má éno, kpokèjì bà kù' bà mì ndú wálá.

21 Tacó éno, ndú ṛò Mbírì ni gî, káa ndú biya bà te duù mítí wó go ṛinó náa à tí nó bíyá-biya, ndú delè 'dè nìkì maa ji yí lá. Ndú gii dù kù koṛo a ndâ ṛa 'vìrì có mì ndú ta gbí ndú wálá. Bìndi ká vò muu ndú ta cèe kóró-koṛo có gbí wálá nó gii volo ndii ṛinó sàa kùṛo nó gî.

22 Ndú kù bàkà tí ndú tí ndâ mbe 'di gbí-o, káa ndú a ndâ mbe ṛónókó.

23 Ndú 'vìsì tí ndú 'do tí bà zeke ngba Mbírì tí nó náa yí bà dù ká dúú bà ya tí nó gítí bà zeke ngba ndâ 'bí ṛa i ṛinó ta gbí ndú wálá mbe je kózò tí ndâ 'duù, ta ndâ nuù, ta ndâ nò, ta ndâ gù kpoo, náa ndú bà cì gî.

24 Ṛinò a gbí nderè có tí nó náa Mbírì jee ta tàmuu ndú ji ndâ i-zuù mì ndú mbe nìkì tí ndú, ta bà bàkà ndâ i-nò gbí òkò tí ndú nó ká nò.

25 Tacó ndú 'vìsì yúco mì Mbírì ta 'vére. Ndú gii dù kù bàkà i, ta bà bàkà nètè a i ji ndâ i tí nó náa à suu ndú súú-suu nó, si bà bàkà i ji 'dóo mbe suu ndâ i, náa à 'ví ùlù yí dúú bà ya tí nó, mí to! Go-i-tí-nò.

26 Tacó éno, Mbírì gii si tàmuu ndú ji ndâ i-nò mì ndú mbe nìkì tí ndú nò. Ndâ niì mì ndú bè bà toko bà sili á ta ndâ 'dakò mì ndú go ṛinó náa à tí nó gî, kù toko bà sili ndí ká gbí òkò tí ndú tí ndâ niì ta kpéetí ndú.

27 Ndâ 'dakò kpónó bè ndâ nawù ndú tà'i 'dáá gî, njembí ndú ká tí bà sù ta ndâ 'bí ka ndú 'dakò, ta nò ṛo ndú gítí wálá. Ṛinò a i tí nó mbe si Mbírì 'ví waa có mítí ndú go ṛinó náa à tí nó ká nò.

28 Ndú ò Mbirì tí i kùro ndú lá, tacó éno, Mbirì gii je vò muu ji ndú, tacó wàa, ndú 'ví bàkà káa ndá i ònó mbe 'vii ro 'bá lá nò.

29 Ndú volo ndii bà gî; ndú a ndâ vo-vò mbe bèè ro Mbirì, ndâ vo-vò mbe gbolò njembí, ndâ vo-vò mbe go i, ndâ vo-vò mbe kii, ndâ vo-vò mbe zi ku, ndâ vo-vò mbe gò gó, ndâ vo-vò mbe eendi ndâ 'duù, ndâ vo-vò mbe bàkà ndâ i mbe mìlisé tí ndâ 'duù, ndú a ndâ mbe 'dè ngùrù-ngùrù có.

30 I tí ndú a bà nì rẹ, ta bà sogo Mbirì, ta biimo, ta bà si ndâ kpo 'duù tí i lá, ta bà luguu tí ndú, ta bà 'di có mì ndâ bu ndú ta ndâ nawu ndú lá.

31 Muu tí ndú wálá, nambeè ta ndú go nambeè ta ngo díí, tó có gbí njembí ndú gítí ndâ 'bí 'duù wálá, yé ro 'duù tí ndú wálá.

32 Ndú ò ni ngbàrángà'i gî, máa, có mì Mbirì máa, à 'vii ta 'duù ònó mbe bàkà ò ndâ vò i tí nó káa ku, káa ndú kpòò kù bàkà ndú, ndú delè kpòò kù je wotí ji ndâ mbe kù bàkà ndú.

2

Bà waa có mì Mbirì

1 À má éno, wò má kù waa có mítí 'bí 'duù, wò kù duu nò a bù gítí lo ta 'bí lo. Tacó wò kpétí káa gba, wò rò 'dâ lá, wò kù bàkà káa gbèè ò vò i tí nó náa wò kù waa có mítí 'duù tí nó tacó nó.

2 Ndoò ò ni gî máa, Mbirì kù waa có ta yúco mítí 'duù mbe bàkà ò vò i tí nó náa ndoo kù waa có mítí 'duù tí nó tacó nó.

3 Káa wò kojo máa, wò tí 'duù má waa có mítí ndâ mbe bàkà ò vò i tí nó, káa 'dóó wò ta mii lo delè kù bàkà gbèè ò ndâ vò i tí nó, wò bà ndo 'do nje bà waa có mì Mbirì gî?

⁴ Wò kù ño ña gbolò nambeè mi Mbíri nò ñó-ño? Bà zèè njembí Mbíri, ta bà toṛo ndâ vò i mi lo mítí wó tí bàà nò, 'dáá ṛo lo me có lá gi? Wò ñò ni lá máa, Mbíri kù bàkà ndâ i tí nò ji wò tacó wàa wò 'ví 'visì ta muu lo 'do tí ndâ vò i mi lo?

⁵ Káa tù lo 'di có lá, wò ta ngbútù kù kili kpo-tàkòcò mi Mbíri mí muu lo ta o bà co Ri ba tùbà kpo-tàkòcò mi wó, ta bà tùbà bà waa có mi wó ta yúcó nò.

⁶ Mbíri ta o tí nò bà ko mboo nèté mi 'duù ji yí 'vii ká ta po nèté mi wó.

⁷ Yí bà je 'válá ñinó mbe cee lá nó ji ndâ mbe nanaka muu ndú mítí bà bàkà tó i, ta ndâ mbe kù pà bà ñò ngba wó tí Mbíri, ta ndâ mbe pà kpokèjì gítí bà tègàrà yí, giù je ndâ mbe kù pà 'válá ñinó mbe cee lá náa yí kù je ji ndâ 'duù nò.

⁸ Káa ndâ 'duù ñinó mbe kù koṛo tó i ká gítí miṛi ndú, mbe tùbà bà 'di yúcó lá, mbe kù 'di a có mi vò i nó bà ñò kpo-tàkòcò mi Mbíri mítí ndú ta ṛo ndú.

⁹ Ndâ 'duù tí nó 'dáá gí mbe bàkà vò i nó bà tù gázù, ndú delè bà kònò sé'i; ndâ Jùdéyà ká bà ñò mítí ndú kùṛo, bìndi sè ndâ 'bí ña ndâ 'duù gí tàkò ndú.

¹⁰ Káa, Mbíri bà si ndâ 'duù ñinó mbe bàkà tó i nó 'ví dù gbí ngba'o, yí bà te duù mítí ndú, yí delè bà si ndú 'ví dù ñìkì maa; ndâ Jùdéyà kùṛo, bìndi sè ndâ 'bí ña ndâ 'duù gí tàkò ndú.

¹¹ Tacó 'bè gbí òkò tí ndâ 'duù kùṛo Mbíri wálá.

¹² Mbíri bà waa có mítí ndâ 'duù ñinó 'dáá gí mbe bàkà vò i, káa ndú me ndâ mbe ṛu ndi có mi Mòze lá nó, me ta có mi Mòze lá; káa yí bà waa có mítí ndâ 'duù ñinó mbe kù ṛu ndi có mi

Mòze mbe bàkà vò i nó ta có mì Mòze.

¹³ Tacó ndâ 'duù kù 'vala jáá kùro Mbíri me ká ta bà 'di có mì Mòze cuki lá, à bà bàkà go có mì Mòze ká kù si ndâ 'duù kù co tí jáá kpokèjì mì Mbíri.

¹⁴ Ndâ 'duù ònó mbe ò dúú kpokèjì bà bàkà nambeè ta Mbíri ni lá, mbe 'di ndâ có gbí wáràgà mì Mòze lá nó, má bàkà i go có mì Mòze 'do gbí 'dóó kóró-koro có mì ndú, kóró-koro có mì ndú nó gí tí có mì Mòze tacó tí ndú. Ndú tà kpétí má 'di có mì Mòze lá.

¹⁵ Ndâ cè ò bà bàkà i mì ndú kù túbà máa, Mbíri cu ndâ i tí nó náa Mòze 'dè có máa ndâ 'duù 'ví bàkà nó mí gbí njembí ndú gí. 'Bí i delè kù túbà jì ndú gbí njembí ndú máa, ndâ cè ò bà bàkà i mì ndú nò dú. Ndâ kóró-koro có mì ndú delè ta ndâ 'bí o kù kpì ngbàngà tí ndú, ndú delè ta ndâ 'bí o kù tì muu ndú.

¹⁶ Ta o bà co ọ̀rì tí nó náa Mbíri kèjì gí bà tuu Jézù tí Bìndi-Mbíri gí bà waa có mítí ndâ có kóó tí nó gbí njembí ndâ 'duù nó, go Banga-Ngú-Có tí nó náa ye kù ma nô.

Ndâ Jùdèyà ta có mì Mòze

¹⁷ Wò má 'dè có máa, wò a Jùdèyà mbe 'di có mì Mòze ta njembí lo gbaànjé, ta nô bà wu gbí nambeè tí nó gbí òkò tí yo ta Mbíri nó ọ̀ro lo wálá;

¹⁸ wò tí mbe ò có gbí njembí Mbíri ni gí, mbe ò 'bè gbí òkò tí ndâ yúco ta 'vére ni gí, tacó à nìbà ndâ có mì Mòze jì wò gí;

¹⁹ wò má ò ni ngbàrángà'i gí, máa, wò a mbe kù ja ndâ mbe sú ọ̀ro, tí ngba'o kùro ndâ 'duù tí nó mbe kù nò gbí 'dí'di'o nó,

20 tí mbe kù túbà bà lê tí ndâ i ji ndâ mbe ñónókó, tí mbe kù ñìbà i ji ndâ 'viù, wò ñò ni ngbàrángà'i gî, máa, có mì Mòze a yúcó mbe kù je muu me gbolò ji ndâ 'duù;

21 wò kù ñìbà i ji ndâ 'bí ka lo, káa wò ñìbà i gítí 'dóó mīrì lo lá? Wò kù kò-kò ji ndâ 'duù máa, «Ngbà i lá,» káa wò kù ngbà i?

22 Wò kù 'dè có ji ndâ 'duù máa, «Bàkà bangbaya lá,» káa wò kù bàkà bangbaya? Wò tí mbe kù sogo ndâ sú mbírì ká dù ndi kù ngbà i ta wotí 'do tà ndâ 'bá mì ndâ sú mbírì?

23 Wò tí mbe kù wu gbí ndâ có mì Mòze ká kù kpò có mì Mbírì ta bà biya bà 'di có mì Mòze?

24 Tacó à cu mí gbí wáràgà mì Mbírì éno máa, «Ndâ 'duù ñìnó mbe ñò dúú kpokèjì bà bàkà nambeè ta Mbírì ni lá nó kù 'dè zu có gítí Mbírì 'do gbí có mì ndâ Jùdéyà mbe kpò có mì Mòze gî.»

25 Bà ya gí gbí gázâ a i ta i gbí me gbolò, náa wò má kù 'di có mì Mòze nò; káa wò má 'di có mì Mòze lá, bà ya wò gí gbí gázâ 'vii ká 'vii ta bà ya wò lá.

26 À má éno, 'bí 'duù mbe ya gí gbí gázâ lá má kpolo tí ndâ có gbí wáràgà mì Mòze, 'duù tí nò bà dù me ká go 'duù ñìnó mbe ya gí gbí gázâ gí nó lá?

27 À má éno, ndâ 'duù tí nó mbe ya gí gbí gázâ lá, káa ndú kù kpolo tí ndâ có mì Mòze nó bà waa có mítí yo tí ndâ mbe ya gí gbí gázâ gî, káa yo kpolo tí ndâ có mì Mòze náa à kuu mì yo gbí wáràgà nó lá nò.

28 Tacó à kù nì cèè Jùdéyà a i mítí 'duù me ká gítí có máa à jò yí tí Jùdéyà gî nò lá. Gbolò i gbí

bà ya gí gbí gázâ delè me káa bà po nje kú tí 'duù lá.

²⁹ Cèe Jùdéyà a 'duù ñìnó ta njembí wó dú kùro Mbíri nô, cèe gázâ a i gbí njembí 'duù, cèe bà ya gí gbí gázâ a nèté mì Mbíri, à me có náa à cu mí gbí wáràgà sínò lá. À ùlù ña 'duù tí nò a Mbíri, à me ndâ 'duù muu to tí nó ká kù ùlù yí lá.

3

¹ À gbí bà dù 'duù tí Jùdéyà a yè? À gbí bà ya 'duù gí gbí gázâ a yè?

² I gbí bà dù 'duù tí Jùdéyà ngé. Kpédélé i gbí bà dù 'duù tí Jùdéyà a ñìnó máa, Mbíri táánò je ndâ có mì wó a i jì ndú.

³ A yè táánò ká bà bàkà tí náa ndâ 'bí 'duù gbí òkò tí ndú má ñònòkò gbí 'bá ndú 'do tí Mbíri gí? Mbíri táánò bà ñònòkò a gbí 'bá wó 'do tí ndú go i mì ndú nò?

⁴ Gbaànjé lá! Kpêti ndâ 'duù muu to tí nó 'dáá gí káa ndâ mbe 'vére, Mbíri bà dù ta o 'dáá gí ká tí mbe yúcó, á go có tí nó náa à cu mí gbí wáràgà mì wó tí Mbíri máa,

«Taco wàa, à 'ví ñò wò ni tí mbe yúcó 'do tí ndâ có mì lo,
wàa wò 'ví kpò nje ndâ 'duù gbí ngbàngà gí,» nô.

⁵ Káa 'bí 'vé a ñìnó máa, ndâ vò i mì ndoo má dù tí ndâ i mbe kù tubà máa, Mbíri a 'duù ñìnó jáá nó, ndoo 'ví 'dè gítí máa yè? Ndoò 'ví 'dè éno máa, Mbíri me 'duù ñìnó jáá nó lá, náa tàkòcò wó má kpòlo gítí ndoo nò? Ye 'vee ndâ 'vé tí nó ká go bà 'vee 'vé mì ndâ 'duù nô.

⁶ Ngé lá! Tacó à má ènò, Mbíri bà waa có mítí ndâ 'duù muu to tí nó ée?

⁷ Káa à má a ndâ 'véřè mì ye ká kû si Mbíri 'ví túbà yúcó mì wó gí sè ngbárángà'i ndii ñinó sàà kùro nó gí, à kpòò ñinó kú 'dè ye máa, ye a mbe bàkà vò i, tacó yè?

⁸ Ndoò má bàkà vò i wàa ndâ vò i tí nò 'ví jò tó i káa yè? Á go có tí nó náa ndâ 'bí mbe 'dè vò nje kú cu mítí ndoo nô! Káa bà waa có mì ndú nò dú.

'Duù jáá kùro Mbíri wálá

⁹ Nò wàa yè? Ndoò tí ndâ Jùdéyà ñikí ndii sè ndâ 'bí 'duù gí? Ngé gí lá! Tacó ye 'dè sàà kùro gí, máa, ndoo tí ndâ Jùdéyà ta sè ña ndâ 'duù 'dáá a ndâ i-tà-tàmà mì vò i,

¹⁰ á go có tí nó náa à cu mí bà ndâ 'bí to gbí wáràgà mì Mbíri máa,

«'Bí 'duù gbaànjé tí 'duù jáá kùro Mbíri wálá,

¹¹ 'bí 'duù gbaànjé ta muu tí wó wálá,

'bí 'duù gbaànjé mbe pà bà tí Mbíri wálá.

¹² Ndâ 'duù 'dáá 'visi kapí ndú gítí Mbíri gí,

ndú 'dáá ya lè gí,

'bí 'duù mbe bàkà tó i wálá,

kpétí káa gbèe 'duù wálá.»

¹³ «Pó zì ndâ có gbí nje ndú go pó zì ku gbí guù, à yè gbí nje ndú ma káa 'véřè,»

«Ndâ có gbí nje ndú me juù go já kpoo.»

¹⁴ «À yè gbí nje ndú káa sémé ta ju có.»

¹⁵ «Kò ndú zì-zì gítí bà ya gí bà zi ku,

¹⁶ ndú má có tí kpokèjì,

à dù á bìndi ndú káa ndâ mòòkò ta ndâ i-yé ro,

17 ndú òò kpokèjì bà 'vala ta ndâ 'duù gbí 'dê tí ni lá.»

18 «Ndú delè cì gúku tí Mbířì gbaànjé lá.»

19 Ndoò òò ni gî máa, ndâ có tí nó gbí wáràgà mì Mòze nó 'dáá gî ká tacó tí ndâ 'duù tí nó náa à kù zogo ndú ta có mì Mòze nó, tacó bà nè kpokèjì bà kù' bà mì ndâ 'duù gî, wàa Mbířì 'ví dù tí mbe waa có mì ndâ 'duù 'dáá gî.

20 Tacó wotí tí có mì Mòze gítí bà bàkà 'bí 'duù gbaànjé muu to tí nó tí 'duù jáá kùro Mbířì nó wálá, i òò náa có mì Mòze kù bàkà nó káa bà bàkà 'duù 'ví òò ni éno máa, yì a mbe bàkà vò i.

Ngú kpokèjì bà bàkà 'duù mì Mbířì tí 'duù jáá kùro wó

21 Káa Mbířì kpónó túbà 'bí òò ngú kpokèjì bà bàkà ndâ 'duù mì wó tí ndâ 'duù jáá kùro wó mbe co tende 'do tí có mì Mòze gî. Ndâ có gbí wáràgà mì Mòze, ta ndâ có gbí ndâ wáràgà mì ndâ mbe 'dòkò có mì Mbířì, kù 'dè yúco a i gítí ngú kpokèjì tí nó.

22 Ngú kpokèjì bà bàkà ndâ 'duù mì Mbířì tí ndâ 'duù jáá kùro wó nó a bà tee njembí ndâ 'duù òò 'dáá gî mbe ùnje gítí Jézù nó mítí Jézù tí Bìndi-Mbířì, tacó 'bè gbí òkò tí ndâ 'duù 'dáá gî kùro Mbířì wálá.

23 Tacó ndâ 'duù 'dáá gî bàkà vò i, bìndi bà yee gbí ngba Mbířì gii kpò ndú gî.

24 Káa a nambeè mì Mbířì náa yí bàkà jì ndâ 'duù 'dáá gî sínò nó ká gii 'viindi nambeè gbí òkò tí ndâ 'duù ta Mbířì ta rẹ mì Jézù tí Bìndi-Mbířì, tí mbe njaanga miři ndâ 'duù 'do gbí vò i.

²⁵ Mbíri je Bìndi-Mbíri tí Jézù tí i-cí-ci, tacó wàa mbelè wó 'ví dù tí i mbe si yì 'ví je à-cee-gî gítí ndâ vò i mì ndâ mbe tee njembí ndú mítí Bìndi-Mbíri. Mbíri bàkà éno tacó bà túbà jì ndâ 'duù máa, yì tí Mbíri waa có ta yúco, tacó yí táánò sàà kùro kù toṛo ndâ vò i mì ndâ 'duù mítí wó tí bàà.

²⁶ Káa yí gbí ngú o tí nó kpónó nó kù túbà tí wó tí mbe kù waa có ta yúco ta bà bàkà ndâ 'duù ñìnó mbe kù tee njembí ndú mítí Jézù nó tí ndâ 'duù jáá kùro wó.

²⁷ À má éno, ndoo kpónó bà wu gbí tí ndoo máa ndoo 'vala tí ndoo 'do gbí vò i gî á ta rè yè? 'Bí i náa ndoo bà wu gbí tí ndoo á tacó nò wálá. Tacó yè? Tacó náa ndoo kù 'di có mì Mòze nò? Ngé lá! Tacó ndoo kù tee njembí ndoo mítí Bìndi-Mbíri.

²⁸ Tacó ndoo ùnje gî, máa, 'duù kù dù tí 'duù jáá kùro Mbíri ká 'do gbí bà tee njembí wó mítí Bìndi-Mbíri, me 'do gbí bà kpolo tí ndâ có mì Mòze lá.

²⁹ Yo kù koṛo có máa, Mbíri káa Mbíri mì ndâ Ìzìriyèlì ta kpéetí ndú? À me éno lá. Yí a Mbíri mì ndâ 'bí tende ña 'duù delè.

³⁰ Mbíri lê má ká gbaànjé, yí bà bàkà ndâ Ìzìriyèlì tí ndâ 'duù jáá kùro wó 'do gbí có bà tee njembí ndú mítí Jézù, yí delè bà bàkà ndâ 'duù ñìnó náa ndú me ndâ Ìzìriyèlì lá nó tí ndâ 'duù jáá kùro wó delè 'do ká gbí có bà tee njembí ndú mítí Jézù.

³¹ Gbí có tí nò kpónó máa, ndoo 'va có mì Mòze gí 'dè gî tacó bà tee njembí ndoo mítí Jézù? Gbaànjé lá! Tende co tí, a bà tee njembí ndoo

mítí Jézù ká kù si ndoo 'ví zèè có mì Mòze tí kpoò.

4

Bà mèlè ndi Àbìráámò

¹ À má éno, ndoo 'ví 'dè gítí Àbìráámò tí 'duù tí nó mbe jò ndâ bu ndoo nó máa yè?

² Tacó áá táánò má a ndâ i gbí 'bì Àbìráámò ká bàkà yí tí 'duù jáá kùro Mbíri, Àbìráámò táánò bà 'de i bà wu gbí tí wó tí gí. Káa yí bà wu gbí tí wó me mí kùro Mbíri lá.

³ Tacó à cu mí gbí wáràgà mì Mbíri máa, «Àbìráámò táánò ùnje gítí Mbíri, tacó éno, Mbíri gii bàkà Àbìráámò tí 'duù jáá kùro wó.»

⁴ 'Duù má 'de i 'do gbí bà ka wu'o, i tí nó a i gbí wu'o mì wó, à me i-nambeè lá.

⁵ Káa 'duù má bàkà nèté lá, káa yí kù tee njembí wó mítí Mbíri, tí mbe kù bàkà ndâ mbe bàkà vò i tí ndâ 'duù jáá kùro wó nó, a bà tee njembí 'duù tí nó mítí Mbíri ká bà si Mbíri 'ví bàkà yí tí 'duù jáá.

⁶ Káa kòcò Dàvídè tí gbolò gba mì ndâ Ìzìriyéli táánò gítí ndâ nambeè tí nó náa Mbíri bàkà jì 'duù ònó mbe bàkà nèté lá, káa yí gii si yí tí 'duù jáá kùro wó tí Mbíri nó, éno máa,

⁷ «Ndâ 'duù tí nó náa Mbíri je à-cee-gí gítí ndâ vò i mì ndú gí,
delè náa Mbíri 'bu i mí muu ndâ vò i mì ndú gí nó,
a ndâ mbe tó pá!

⁸ 'Duù ònó náa Mbe tí ndoo bà si ndâ vò i mì wó tí có lá nó,
a mbe tó pá!»

⁹ Tó pá tí nò náa Dàvídè táánò 'dè có gítí nò ká tacó tí ndâ 'duù ñinó mbe ya gí gbí gâzâ gí nó cuki, wèè, à delè tacó tí ndâ 'duù ñinó mbe ya gí gbí gâzâ lá nó? Ndoò kú 'dè có máa, à cu mí gbí wáràgà mì Mbíri, máa, «Àbìráámò táánò ùnje gítí Mbíri, tacó ènò, Mbíri gii si yí tí 'duù jáá 'do gbí có bà ùnje mì wó nò.»

¹⁰ Mbíri táánò bàkà Àbìráámò tí 'duù jáá kùro wó nò ta o ngàyi? Kùro bà ya yí gí gbí gâzâ, wèè, á bîndi bà ya Àbìráámò gí gbí gâzâ? Mbíri bàkà yí a i kùro bà ya yí gí gbí gâzâ.

¹¹ Yí gii ya gí gbí gâzâ a i bîndi có tí nò, tacó bà túbà máa, Mbíri táánò bàkà yí tí 'duù jáá kùro wó tí Mbíri 'do gbí có bà tee njembí wó mítí wó si yí ya gí gbí gâzâ kálásê. Mbíri bàkà ènò tacó wàa Àbìráámò 'ví dù tí bu ndâ 'duù tí nó 'dáá gí mbe ya gí gbí gâzâ lá, káa yí tí Mbíri gii bàkà ndú tí ndâ 'duù jáá kùro yí gí nò.

¹² Àbìráámò delè a bu ndâ 'duù tí nó táánò mbe ya gí gbí gâzâ gí nó, me ká cuki tacó náa ndú ya gí gbí gâzâ gí nò lá; yí a bu ndú tacó ndú kú tee njembí ndú mítí Mbíri go i mì bu ndoo Àbìráámò táánò á kùro bà ya yí gí gbí gâzâ.

À 'de i tàkò cí mì Mbíri 'do gbí bà tee njembí 'duù mítí wó

¹³ Káa cí tí nó náa Mbíri táánò ci ta ndâ Àbìráámò ta ndâ 'vii bîndi wó, máa, to tí nó bà dù tí mbèlè mì ndú nó, 'do me gbí có bà 'di có mì Mòze mì Àbìráámò nò lá. À gí a i 'do gbí có bà tee njembí Àbìráámò mítí Mbíri, bîndi Mbíri gii bàkà yí tí 'duù jáá kùro wó.

14 Tacó à má 'dè có máa, à káa ndâ mbe 'di có mì Mòze ká zèè to tí nó tí mbèlè mì ndú, gbí éno máa, bà tee njembí 'duù mítí Mbírì me i lá, i gbí ndâ cí mì Mbírì delè wálá.

15 Tacó có mì Mòze kú gí ta kpo-tàkòcò mì Mbírì gítí ndâ 'duù, káa bàndò tí nó náa có mì Mòze tí wálá nó, ndâ 'duù kpò có mì Mòze lá.

16 Tacó éno, cí tí nó táánò náa Mbírì ci ta Àbìráámò nó rò kpolo ma a i mítí có bà tee njembí mítí wó tí Mbírì, cí tí nó kpolo ma a i gítí i-nambee mì Mbírì sínò ji ndâ 'viì-gù Àbìráámò 'dáá gí, à me ká cuki ji ndâ mbe kú kpolo tí ndâ có mì Mòze lá, à delè tacó tí ndâ mbe kú tee njembí ndú mítí Mbírì go i mì Àbìráámò, tacó yí a bu ndoo 'dáá gí,

17 á go có tí nó náa à cu mí gbí wáràgà mì Mbírì máa, «Ye bàkà wò tí bu ndâ 'duù me mbè muu to tí nó gí,» nô. Àbìráámò a bu ndoo kùro Mbírì tí nó náa yí tee njembí wó mítí wó, tí mbe kú je 'válá ji ndâ ku, delè náa ndâ i ònó náa ndú sàà wálá nó kú bàkà tí 'do gbí có mì wó nô.

18 Àbìráámò táánò ùndi i tàkò cí tí nó náa Mbírì ci ta yí máa, «Ndâ 'viì-gù lo bà me mbè go ndâ yii tàrì,» nó kpòò, kpò tí. Káa yí kpòò kú tee káa njembí wó mítí Mbírì tacó éno, yí gù gí tí bu ndâ 'duù me mbe.

19 Ndoò tí Àbìráámò ta o tí nó náa Mbírì ci ta yí gítí bà jò 'viì nò dè gítí zi'duù-vô; yí ta o tí nó òò ni gí máa, yí a kánjí ku, yí delè gù òò ni gí máa, nawù yí Sàrà a kázá.

20 Kpèti ká éno, yí zò gbí nje wó gítí có tí nó náa Mbírì ci ta yí nó lá, yí delè me kpìkì-kpìkì

gítí bà tee njembí wó mítí Mbírì lá; bà tee njembí mítí Mbírì gù je wotí bà ùlù Mbírì jì yí ndii ñinó sàà kùro nó gí.

²¹ Cò ta kponje gítí gbaànjé nje wó wálá a ñinó máa, «Yâ-cí-ci mì Mbírì kpili lá.»

²² Ñinò a gbí nderè cò tí nó náa Mbírì gù si ta yí tí 'duù jáá kùro wó tí Mbírì nó ká nò.

²³ Cò tí nó náa à cu mí gbí wáràgà mì Mbírì máa, «Àá táánò cu 'bì mítí wó máa yí a 'duù jáá kùro Mbírì,» nó, me ká gítí Àbìráámò ta kpéetí wó lá.

²⁴ À cu delè gítí ndoo, náa ndoo má ùnje gítí 'duù tí nó mbe 'vala ndi Jézù tí nó,

²⁵ náa à zi yí táánò tacó ndâ vò i mì ndoo, káa Mbírì gù 'vala ndi wó 'do gbí muu'dú wó tacó bà bàkà ndoo tí ndâ 'duù jáá kùro Mbírì gí nô.

5

Bà dù tí 'duù jáá kùro Mbírì

¹ À má éno, ndoo lê má kù dù tí ndâ 'duù jáá kùro Mbírì 'do a i gbí cò mì bà tee njembí ndoo mítí Mbírì, gbí òkò tí ndoo kù dù ñikì maa ta Mbírì ta rẹ Mbe tí ndoo Jézù tí Bìndi-Mbírì.

² A bà tee njembí ndoo mítí Mbírì ta rẹ mì Jézù ká si ndoo 'ví yèè dè gítí Mbírì, náa yí kpónó kù bàkà ta nambeè jì ndoo ta o 'dáá gí, náa ndoo kù dùlù ta tí ndoo, kù koṛo ta cò gítí bà dù gbí ngba Mbírì nô.

³ Káa à cuki nò me káa i ñinó náa ndoo bà dù ta líkí'o nó lá, ndoo delè bà dù ta líkí'o bà kònò ndâ sé'i mì ndoo, tacó a bà kònò ndâ sé'i ká kù jò yú njembí.

⁴ Káa a yú njembí ká kù jò cè bà bàkà i ñìnó mbe kù peteke tàkòcò Mbírì nò, cè bà bàkà i ñìnó mbe kù peteke tàkòcò Mbírì nò ká kù jò bà koṛo có lì mítí Mbírì.

⁵ Káa bà koṛo có lì mítí Mbírì te nò mí ɾo ndoo lá, tacó Bèri-mì-Mbírì náa à je jì ndoo nó yè gbí njembí ndoo ta tó bà zè tí mì Mbírì gî.

⁶ Bìndi-Mbírì táánò cì tacó tí ndoo ta o tí nó náa à gbí muu Mbírì nó, si ndoo tí ndâ mbe bàkà vò i; ta o tí nò wotí bà 'vala miṛi ndoo tí ndoo wálá, nje wú delè tí ndoo wálá nò.

⁷ Bà 'de 'duù ñìnó mbe gbí gbí njembí wó gítí bà cì á muu 'duù ñìnó jáá kùṛo Mbírì nó kpóló-kpolo, 'duù kpèti ndâ-'bî-lá bà zèè njembí wó tacó bà cì á muu tó 'duù gî.

⁸ Káa Mbírì túbà bà zè ndoo mì wó ñìkì maa jì ndoo ta bà cì Bìndi-Mbírì á muu ndoo si ndoo táánò a ndâ mbe bàkà vò i.

⁹ Káa Bìndi-Mbírì lê táánò má bàkà ndoo tí ndâ 'duù jáá kùṛo Mbírì ta bà cì yí tacó tí ndoo gî, yí kpónó bà 'vala ndoo 'do nje kpo-tàkòcò mì Mbírì ta wotí ká tí.

¹⁰ Tacó 'Viì-mì-Mbírì lê má cì tacó bà bàkà ndoo tí ndâ kómbe Mbírì si ndoo táánò a ndâ ku'dì tí Mbírì nó gî, yí kpónó bà 'vala ndoo 'do gbí ndâ vò i mì ndoo si yí tí wu wó nó ta wotí ká tí.

¹¹ Káa à cuki me ká éno lá, ndoo delè kù dù ta líkí'o Mbírì tí ndoo ta ɾè mì Mbe tí ndoo Jézù, náa ndoo kù zèè kómbeè ta Mbírì ta ɾè mì wó.

Ndâ Ádàmà ta Bìndi-Mbírì

¹² A gbèè 'dakò táánò ká gí ta vò i gí muu to tí nò, vò i giì gí ta ku, bìndi ku giì 'vèè cee gbí

ḡa ndâ 'duù 'dáá gî, tacó ndâ 'duù 'dáá gî a ndâ mbe bàkà vò i.

¹³ Vò i táánò sàa kuu muu to tí nó kùro bà gî có mì Mòze, káa Mbírì táánò ki 'bì wó tí vò i mì ndâ 'duù tí bàndò tí nó náa có mì Mòze tí wálá nó lá.

¹⁴ Kpétí ká éno, ku táánò 'bità bà ziki ndâ 'duù 'do gbí o mì Ádàmà yee gbí o mì Mòze. Ta ndâ ḡa ḡinò 'dáá gî, ndâ ḡa ndâ vò i mì ndâ 'duù tí nó náa ku táánò ziki ndú nó me go ḡa vò i mì Ádàmà ta o tí nó náa yí kpò ta có mì Mbírì nó lá. Ádàmà táánò ká go ngò've i gbí nǐ kùro 'duù tí nó kèjì nò.

¹⁵ Káa i-nambee mì 'duù tí nó kèjì nó me go vò i mì Ádàmà lá. Tacó vò i mì gbèe 'dakò má mì ndâ 'duù me mbè, kponje gítí wálá, máa, Mbírì bàkà nambee me gbolò sínò jì ndâ 'duù me mbè ta rẹ̀ mì gbèe 'dakò tí nó tí Jézù, tí Bìndi-Mbírì nò.

¹⁶ Káa có tàkò gbèe i-nambee tí nó náa Mbírì je jì ndâ 'duù sínò nó me go có tàkò vò i mì gbèe 'dakò tí nó nó lá. Tacó gbèe vò i gí ta bà waa có ku mítí ndâ 'duù, káa gbèe i-nambee mbe gí gí tàkò ndâ vò i me mbè kù njaanga miṛi ndâ 'duù á 'do gbí vò i.

¹⁷ À dú káa yúco máa, ku kpónó zèè to 'do gbí có mì vò i mì gbèe 'dakò, ta rẹ̀ mì gbèe 'dakò tí nó. Káa i tàkò i tí nó náa gbèe 'dakò tí nó tí Jézù tí Bìndi-Mbírì bàkà nó me gbolò ngé ndii gî. Mbírì bàkà nambee jì ndoo me gbolò, yí delè gii ùnje bà dù ndoo tí ndâ jáá 'duù ta rẹ̀ mì Jézù. Tacó éno, ndoo bà zogo to tí nó go ndâ kpo-kpò gba ta rẹ̀ mì Jézù tí Bìndi-Mbírì.

18 À má éno, go ñinó náa vò i mì gbèe 'dakò ká ga wú mítí miṛi ndâ 'duù 'dáá gî nó, à delè káa gbèe tó i náa gbèe 'dakò bàkà ká njaanga wú 'do tí miṛi ndâ 'duù 'dáá gî, à delè káa gbèe tó i tí nó ká je 'válá ji ndâ 'duù 'dáá gî.

19 Tacó à bàkà ndâ 'duù me mbè tí ndâ mbe bàkà vò i 'do gbí có bà 'di có lá mì gbèe 'dakò; à delè bà bàkà ndâ 'duù me mbè tí ndâ 'duù jáá kùro Mbíri 'do gbí có bà 'di có mì gbèe 'dakò.

20 Có mì Mòze gí tacó bà àdì ndâ vò i, káa bàndò tí nó náa vò i àdì tí nó, nambeè mì Mbíri àdì ndii gî,

21 tacó wàa, vò i má kù zèè to ta bà mì ndâ 'duù mì ku, nambeè mì Mbíri 'ví zèè to ta bà co tí jáá kpokèjì mì Mbíri mbe ya ta ndoo gítí 'válá ñinó mbe cee lá nó ta rẹ̀ mì Jézù tí Bìndi-Mbíri, tí Mbe tí ndoo.

6

Vò i bà je bà i tí ye wálá lá ká go ku, káa ye kù 'vala ta rẹ̀ mì Bìndi-Mbíri

1 Ndoò kpónó 'ví 'dè máa yè? Ndoò aanga muu ndoo ká mítí bà bàkà vò i, tacó wàa, Mbíri 'ví bàkà ta nambeè ji ndoo me gbolò?

2 Ngé lá! Ndoò tí ndâ mbe biya vò i ká go ku 'ví dù ndi ndoo kù 'vala gbí vò i ta ọ̀ kpokèjì ngàyi?

3 Yo ọ̀ ni lá, máa, ta o tí nó náa àá táánò caka tí ndoo tacó bà dù toko ta Bìndi-Mbíri tí Jézù nó, à delè caka tí ndoo tacó bà cì toko ta yí?

4 À má éno, àá táánò duu ndoo ta ndú ta bà caka tí ndoo ta ndú mí gbí ku, tacó wàa, ndoo delè 'ví 'vala ngú 'válá, go ñinó náa Bìndi-Mbíri

táánò 'vala ta ndi wó 'do gbí muu'dú wó ta wotí m̀ì Buù wò nò.

⁵ Tacó ndoo táánò má gbo ta ndú mí gbí bà cì ña ku m̀ì wó nò gí, kponje gítí bà dù ndoo ta ndú gbaànjé gbí bà 'vala ndi ndoo 'do gbí muu'dú ndoo go i m̀ì wó nò wálá.

⁶ Ndoò ñò ni gí, máa, àá táánò gbì ká d̀ì ndoo toko ta B̀ìndi-Mb̀ìrì m̀ítí njèèkpè m̀ù tacó bà zi ká d̀ì ndoo tí nó náa vò i yè gbí gí nó gí. Tacó wàa, ndoo 'ví dù tí ndâ i-zógó-zogo m̀ì vò i káká'i lá.

⁷ Tacó 'duù má cì gí, yí njaanga nò a m̀ìrì wó 'do gbí vò i gí.

⁸ Káa ndoo táánò má cì ta ndâ B̀ìndi-Mb̀ìrì gí, ndoo ùnje gí, máa, ndoo delè 'vala ta ndú gí.

⁹ Tacó ndoo ñò ni gí, máa, B̀ìndi-Mb̀ìrì bà cì ndi wó b̀ìndi bà 'vala ndi wó 'do gbí muu'dú wó nò káká'i wálá; wotí m̀ì ku káká'i gítí bà zi yí wálá.

¹⁰ Yí cì ta bà gbaànjé, ngbé, tacó bà cee wotí m̀ì vò i; káa yí kpónó kù 'vala a i tí Mb̀ìrì.

¹¹ À má éno, yo kpónó 'ví ñò tí yo á go ndâ ku 'duù jì vò i, wàa yo 'ví ñò tí yo tí ndâ wu 'duù jì Mb̀ìrì ta r̀è m̀ì B̀ìndi-Mb̀ìrì tí Jézù.

¹² Yo si vò i 'ví gèè bè wó mí gbí d̀ì yo tí nó tí putú kàrà nó lá; yo delè 'ví legee m̀ìrì yo gí tàkò có m̀ì go bà bàkà vò i lá.

¹³ Yo 'ví si ndâ bà to tí yo 'ví si tí ndú tí ndâ i bà bàkà nèté m̀ì vò i lá; yo si tí yo a i jì Mb̀ìrì go ndâ 'duù ñìnó náa yí 'vala ndú 'do gbí ku gí; yo lo muu g̀ìrì jì Mb̀ìrì, wàa yí 'ví si ndâ bà to tí yo 'dáá gí tí ndâ i bà bàkà ta tó i;

¹⁴ b̀ìndi vò i káká'i bà gèè bè wó mí muu yo wálá, tacó yo kpónó kù 'vala me ta có m̀ì M̀òze

lá, yo kù 'vala a i ta nambeè mì Mbírì.

Yo kpónó a ndâ bòò mì Mbírì

¹⁵ Nò wàa yè? Nògí, ndoo bàkà vò i tacó náa ndoo kpónó kù 'vala me ta có mì Mòze lá, ndoo kù 'vala a i ta nambeè mì Mbírì nò wàà? Ngé lá!

¹⁶ Yo ñò ni gí, máa, yo má si tí yo tí ndâ bòò mbe 'di có mì 'duù, yo gí tí ndâ bòò mì 'duù tí nò náa yo kù 'di có mì wó nò gí? Yo má kù 'di a có mì vò i, yo bà gbo nje ta ku, yo má kù 'di a có mì Mbírì, yo bà gbo nje ta bà dù tí ndâ 'duù jáá kùro Mbírì.

¹⁷ Káa yo 'ví 'dè ñìkì maa ji Mbírì, tacó yo táánò a ndâ bòò mì vò i, káa yo kpónó zèè yúcó tí nó náa áá táánò ñìbà ji yo nó ta njembí yo gbaànjé.

¹⁸ Áá táánò njaanga wú mì vò i 'do tí mìri yo gí, bìndi áá gii ga mítí mìri yo a wú mì yúcó.

¹⁹ Ye kpónó kù 'dè có ji yo ta nje có mì ndâ 'duù, tacó bà lê jé cee 'do tí 'duù lá, go ña ñìno náa yo ta 'bí o táánò si dìi yo tí i bà-nò-vò-ndò, ta bà bàkà ndâ vo-vò i ñìno mbe 'vii ro 'bá lá nò; à má éno, yo si dìi yo kpónó tí i bà bàkà ndâ i ñìno jáá, ta ndâ tó i kùro Mbírì.

²⁰ Ta o tí nó táánò náa yo a ndâ bòò mì vò i nó, njembí yo mù gítí có bà dù tí ndâ 'duù jáá kùro Mbírì lá.

²¹ Káa yo táánò 'de gbí ndâ i tí nó náa yo bàkà ndú káa à kpónó ro yo a nô ndú nó, a yè? Ndòngbú ndâ i tí nò a ku.

²² Káa à kpónó njaanga wú mì vò i 'do tí mìri yo gí; yo kpónó gí tí ndâ bòò mì Mbírì gí, káa ndâ i náa yo 'de gbí bà dù tí ndâ bòò mì Mbírì a bà

dù tí ndâ tó 'duù, ta bà 'de 'válá ñìnó mbe cee lá nò.

²³ Tacó mboo tàkò vò i a ku, káa i-nambeè tí nó náa Mbíri je sínò nó, a bà 'de 'válá ñìnó mbe cee lá nó, ta bà 'vala toko ta Bìndi-Mbíri tí Jézù, tí Mbe tí ndoo.

7

Yo ñò 'do mì ndâ mbe kò tí ndú

¹ Yo ñò ni lá, ndâ ná'vindí, tacó ye kù 'dè có tí nó a i ji ndâ mbe 'di gbí có mì Mòze gî, máa, có mì Mòze kù zogo 'duù ká si yí gbí wu wó?

² Có mì Mòze kù ẹre nawù 'dakò ji kù wó si kù wó káa wuù; káa kù niì má cì gî, wú tí nó náa có mì Mòze ẹre ta ndú tí ndâ 'dakò ta niì nó kàra 'do tí niì tí nò gî.

³ Gbí có tí nò éno máa, nawù 'dakò má dù ta 'bí tende 'dakò si kù wó káa wuù, có mì Mòze kù zèè yí, máa, yí a mbe zingbà 'dakò; káa 'bí 'dakò má zèè 'bì wó si kù wó cì gî, ẹre wó gbí ñìnò kpòò me mbe zingbà 'dakò lá.

⁴ À má éno, bà cì Bìndi-Mbíri mítí njèèkpè mù nó kpónó bàkà yo tí ndâ 'duù ñìnó náa có mì Mòze kpónó káká'i zèè yo lá nó gî, ndâ ná'vindí, tacó yo kpónó a ndâ bà to tí dii wó; yo kpónó a ndâ nawù 'dakò tí nó náa Mbíri táánò 'vala yí 'do gbí muu'dú wó nó, tacó wàa, yo 'ví dù tí ndâ duù ñìnó ta i ká gbí yo nó kùro Mbíri.

⁵ Tacó ta o tí nó táánò si ndoo kù 'vala ká gí tàkò có mì dii ndoo tí nó mbe yè ta vò i gî nó, có mì Mòze ta o tí nó tanga go vò i 'vèè cee gbí ndâ bà to tí dii ndoo 'dáá gî, kù jò ku.

⁶ Káa ndoo kpónó njaanga wú mì có mì Mòze 'do tí miṛi ndoo gî; a bà cì ndoo ká 'vala ndoo 'do 'bì có mì Mòze táánò tí miṛi ndoo nô; áá táánò njaanga miṛi ndoo 'do gbí có mì Mòze tacó wàa ndoo 'ví bàkà nèté ji Mbíṛi gbí ngú kpokèjì mì Bèṛi-mì-Mbíṛi, me gbí ká kpokèjì mì Mòze náa à cu mí gbí wáràgà nó lá.

Bà ngù nge ta vò i

⁷ Ndoò kpónó 'ví 'dè máa yè? Ndoò 'ví 'dè máa, có mì Mòze a vò i kùṛo Mbíṛi? Gbaànjé lá! Tacó áá táánò má me có mì Mòze lá, ye gí bà ò vò i kùṛo Mbíṛi ni wálá. Áá táánò má me có mì Mòze lá, ye táánò bà ò ni éno máa, bà dù ta go i mì ndâ 'bí 'duù a vò i nó wálá.

⁸ Káa vò i giì 'de kpokèjì bà tanga go ndâ i mì ndâ 'duù mítí ye 'do gbí có mì Mòze nò. Tacó có mì Mòze má wálá, vò i cì gî.

⁹ Ta o tí nó táánò náa ye 'di ndâ có mì Mòze lá nó, ye a wu 'duù; káa ndâ có mì Mòze mâ giì gi gî, vò i giì 'vala ndi wó gî, bìndi ye giì cì gî;

¹⁰ ndâ có tí nó mì Mòze, náa áá táánò 'dè ji ndâ 'duù tí ndâ có mbe je 'válá nó, giì 'visì tí ji ye tí ndâ i ku.

¹¹ Tacó vò i giì 'de kpokèjì gítí bà eendi ye, bìndi vò i giì zi ye gî, 'do gbí có mì có mì Mòze.

¹² À má éno, ndâ có mì Mòze a ndâ có mì Mbíṛi, kòcò Mòze delè a kòcò Mbíṛi, tí kòcò yúco, delè tí kòcò tó có.

¹³ Gbí có tí nó máa, a i tí nó tí tó i nó táánò ká ja ku giì tí gítí ye? Ngé lá! Áá táánò a vò i ká zi ye tacó bà túbà tí wó ngbáràngà 'i gí sè tí ku mbe zi ye ta ò mì tó i, vò i kù 'visì ndâ có mì Mòze á

tí ndâ tó có nó tí ndâ vò i, tacó bà tùbà tí wó tí 'dóó i tí nó tí vò i nô.

Ndâ i mbe ònòkò tí gbí muu 'duù

¹⁴ Ndoò ònò ni gî máa, ndâ có mì Mòze a ndâ có mì Mbírì, káa ye a 'duù muu to tí nó, náa à sì ye tí bòò jì vò i gî.

¹⁵ Ye 'di gbí ndâ i tí nó náa ye kù bàkà nó lá. Tacó ye kù bàkà me ndâ i tí nó ta go ndú tí ye nó lá. Ye kù bàkà káa ndâ i tí nó náa ye kù sogo ndú nô.

¹⁶ Ye kpónó má bàkà i ònò ta go tí ye wálá nó, ye ùnje gî, máa, có mì Mòze a yúcó.

¹⁷ À má éno, à me ye ká kù bàkà i ta muu ye lá, a vò i tí nó mbe kù dù gbí njembí ye nó ká kù bàkà nèté.

¹⁸ Tacó ye ònò ni gî, máa, gbèè tó i mbe kù 'vala gbí dìi ye wálá, ye kù nì a gbí tú ye tí nó mbe yè ta vò i gî nô. Go bà bàkà i ònò tí i dú nó kuu gbí njembí ye, káa, wotí bà bàkà tí ye wálá.

¹⁹ Tacó ye bàkà ndâ tó i tí nó ta go ndú tí ye nó lá, ye kù bàkà a ndâ vò i tí nó ta go ndú tí ye wálá nô.

²⁰ À má éno, ye má bàkà i ònò ta go tí ye lá nó, gbí éno máa, à me ye ká bàkà lá, a vò i tí nó mbe bàkà kudu mì wó mí gbí njembí ye gî nó ká bàkà .

²¹ Tacó éno, ye kpónó gii ònò éno máa, a 'bí i ká kù bàkà nèté, tacó ye má 'dè có máa ye bàkà tó i, à kù co 'bì ye káa vò i.

²² Tacó à ngéé gbí njembí ye tà'i kà a go bà bàkà go có mì Mbírì,

²³ káa ye kù ònò 'bí tende có kù bàkà nèté cee gbí dìi ye 'dáá gî, kù tè tó có tí nó gbí muu ye nó

ta gó. Nìnò a i tí nó mbe kù bàkà ye tí zà-za gó m̀ vò i tí nó mbe bàkà kudu m̀ wó cee gbí dìi ye 'dáá gí nó ká nò.

²⁴ A ña yê yè ká tí ye éno! A 'di ká bà 'vala ye 'do tí dìi tí nó mbe kù ya ta ye gí nje ku nó?

²⁵ À ùlù Mb̀r̀i ta ẹ̀ m̀ Jézù tí B̀ndi-Mb̀r̀i tí Mbe tí ndoo!

À káa ye 'do gbí 'dóo bà koṛo có m̀ ye ká kù bàkà go có m̀ Mb̀r̀i, káa dìi ye tí nó mbe yè ta vò i gí nó 'di a có m̀ vò i.

8

Bà 'vala ta wotí m̀ B̀eri-m̀i-Mb̀r̀i

¹ À má éno, à kpónó bà waa có mítí ndâ 'duù tí nó mbe kù 'vala toko ta B̀ndi-Mb̀r̀i tí Jézù nó wálá,

² tacó có m̀ B̀eri m̀ 'válá, mbe kù 'vala ndâ mbe kù 'vala toko ta B̀ndi-Mb̀r̀i tí Jézù nó, njaanga wú m̀ ndâ ku ta vò i 'do tí m̀ri ye gí.

³ Tacó i tí nó náa bà bàkà táánò kpò có m̀ Mòze gí, tacó dìi ndoo tí nó náa vò i yè gbí gí nó jo'doko wotí m̀ có m̀ Mòze gí nó, Mb̀r̀i g̀i bàkà gí; Mb̀r̀i kpò nje vò i ta bà tuu 'vii m̀ wó ta tú wó go tú 'duù ta vò i yè gbí gí, b̀ndi Mb̀r̀i g̀i waa có mítí vò i tí nó gbí tú wó nò.

⁴ Mb̀r̀i bàkà éno tacó wàa, ndoo 'ví 'di ta có tí nó náa có m̀ Mòze 'dè ji ndoo nó, ta bà 'di có m̀ B̀eri; ndoo 'ví 'di me có m̀ dìi ndoo tí nó mbe yè ta vò i gí nó lá.

⁵ Tacó ndâ 'duù ñinó mbe kù 'vala go có m̀ dìi ndú nó kù koṛo có ká gítí ndâ i m̀ dìi ndú, b̀ndi

ndâ ñìnó mbe kù 'vala go có mì Bèri nó kù koṛo có ká gítí ndâ i mì Bèri.

⁶ Bà koṛo có ká gítí dîi 'duù kù je a ku ji 'duù káa bà koṛo có gítí Bèri kù je a 'válá ñìnó mbe cee lá nó ji 'duù, à delè kù si 'duù 'ví dù ta 'dê njembí wó gítí Mbíri.

⁷ Tacó muu 'duù ñìnó mbe kù koṛo có ká gítí dîi wó nó a muu ku'di tí Mbíri, ña muu tí nó gítí bà 'di có mì Mbíri ngé gî wálá. Wotí bà 'di có mì Mbíri tí ña muu tí nó kpokoo gî wálá,

⁸ wotí bà peteke tàkòcò Mbíri delè tí ndâ 'duù tí nó mbe kù 'di có mì dîi ndú nó wálá.

⁹ Káa yo kpónó kù 'di me có mì dîi yo lá, yo kù 'di a có mì Bèri, náa Bèri-mì-Mbíri dú ta yúcó má bàkà kudu mì wó á mí gbí njembí yo gî nó. 'Duù ñìnó náa Bèri mì Bìndi-Mbíri gbí njembí wó wálá nó, me 'duù mì Bìndi-Mbíri lá.

¹⁰ Ku kpêti má ziki dîi yo á 'do gbí có mì vò i gî, káa Bìndi-Mbíri má kù 'vala gbí njembí yo, gbí éno máa, lilí yo kpòò kù 'vala ká 'vala, tacó à 'viindi nambeè gbí òkò tí yo ta Mbíri gî.

¹¹ Bèri mì mbe te Jézù 'do gbí ku gí yaà nó má kù dù gbí njembí yo, yí tí mbe te Bìndi-Mbíri tí Jézù gí yaà 'do gbí ku nó delè bà si Bèri mì wó 'ví je 'válá ji ndâ dîi tí nó tí ndâ i mì ku nó gî.

¹² À má éno, à me i mì dîi ndoo ká muu ndoo, wàa ndoo 'ví 'vala tí go có mì dîi ndoo nó lá, ndá ná'vindí ye,

¹³ tacó yo má kù 'vala go có mì dîi yo, yo bà cì gî, káa yo má kù 'vala go có mì Bèri, wàa yo 'ví ziki ndá nètè mì vò i gî, yo bà 'vala gî.

¹⁴ Ndâ 'duù tí nó náa Bèri-mì-Mbíri kù tè kùṛo ndú nó a ndâ 'viì mì Mbíri.

15 Tacó Bèri tí nò mì Mbíri náa yí je ji yo nò, me bèri ñinó mbe bàkà yo tí ndâ bòò nó lá, yí delè me bèri ñinó mbe te gúku mítí yo nó lá. Yí a Bèri ñinó mbe bàkà yo tí ndâ 'viì mì Mbíri, tí Bèri ñinó mbe si yo kù nì, «Áá Bàbá, àá Buù!» mítí Mbíri.

16 Bèri-mì-Mbíri ùnje gî máa ndoo kù 'dè a yúco máa, ndoo a ndâ 'viì mì Mbíri.

17 Káa ndoo má a ndâ 'viì mì Mbíri, ndoo a ndâ mbe zèè mbèlè, tí ndâ mbe zèè mbèlè mì Mbíri, ndoo delè a ndâ ka Bìndi-Mbíri mbe zèè mbèlè. Ndoò má gbo ta ndâ Bìndi-Mbíri mí gbí bà kònò sé'i mì wó gî, Mbíri delè bà te duù mítí ndoo ta ndú.

Banga o tacó tí ndâ 'duù mì Mbíri wúnò

18 Ye si bà mbu ndò tí nó náa ndoo kpónó kù mbu nó tí i ɾo ye, wàa ye 'ví 'vii mítí ɲa banga o tí nó náa Mbíri kù si ù ta ndi ndoo nó lá.

19 Tacó ndâ i tí nó 'dáá náa Mbíri suu ndú nó léngé-linge kù ù bà co ɾi tí nó náa Mbíri bà tùbà tí ndâ 'viì mì wó nò.

20 Tacó Mbíri táánò waa có mítí ndâ i tí nó náa yí suu ndú nó me 'do gbí có mì ndú lá; Mbíri waa có tí nó ká 'do gbí có mì wó gbí njembí wó tí Mbíri, ta bà koɾo có,

21 máa, yì wúnò bà njaanga miɾi ndâ i tí nó náa yì suu ndú nó do gbí bà volo ndò, tacó wàa, ndú 'ví dù gbí ngba'o go i mì ndâ 'viì mì Mbíri.

22 Ndoò ɲò ni gî, máa, ndâ i tí nó náa Mbíri suu ndú nó 'dáá gî kù mèlè-mèlè ta sé'i go i mì niì ta gó-káyì tí wó nó, 'do tí bà 'bìtà bà suu to tí nó yee tí wúnó.

²³ Káa à me káa ndâ i tí nó náa Mbírì suu ndú nó ká kù mèlè-mélè ta kpéetí ndú cuki lá; ndoo tí ndâ kpédélé 'duù tí nó náa Mbírì je Bèri mì wó ji ndoo tí i-nambeeé nó delè kù mèlè-mélè gbí njembí ndoo kù ù ta ndi bà bàkà ndoo mì Mbírì tí ndâ 'viì-kó-ko mì wó, wàa yí 'ví si dù ndoo 'ví volo lá.

²⁴ Tacó àá táánò 'vala ndoo a bà ù bà dù ndoo tí ndâ 'viì ñìnó náa a Mbírì ká ko ndoo. Káa ndoo má ñò i tí nó náa ndoo kù ù nó gî, ɾè ñìnò káká'i me bà ù i lá. Tacó a 'di jé ká ù i tí nó náa yí 'de gî nó gî?

²⁵ Káa ndoo má kù ù a ndi i ñìnó náa ndoo ñò ta ɾo ndoo lá nó, ndoo kù ù ta bà zèè njembí ndoo.

²⁶ Bèri-mì-Mbírì kù konì ndoo tacó wotí tí ndoo wálá, delè tacó ndoo ni bà 'deke tí ndoo ji Mbírì go ñìnó náa à tí nó lá; káa Bèri kù 'deke tí wó ji Mbírì tacó tí ndoo ta bà rengà gbí njembí wó tí ña ñìnó náa 'duù bà ni bà 'dè gbí ta nje wó wálá.

²⁷ Káa à káa Mbírì tí mbe ñò ndâ có gbí njembí ndâ 'duù 'dáá gî ká 'di gbí có tí nó gbí njembí Bèri nó, tacó Bèri kù 'deke tí wó ji Mbírì tacó tí ndâ 'duù mì Mbírì 'vii ta có gbí njembí Mbírì.

²⁸ Ndoò ñò ni gî, máa, Mbírì kù bàkà ndâ i 'dáá ká ta ɾè mì tó i ji ndâ 'duù ñìnó mbe zè yí ñìkì maa, náa yí tè'é tí ndú 'do gbí 'dóó có mì wó gbí muu wó nò.

²⁹ Ndâ 'duù tí nó náa Mbírì tè'é tí ndú nó a ndâ 'duù ñìnó náa yí cu 'bì wó mítí ndú sàà táánò, tacó wàa, ndú 'ví dù tí ndâ cè kózò tí 'Viì mì yì tí Mbírì, wàa 'Viì mì yì 'ví dù tí 'viì-kírì mì ndú gbí òkò tí ndâ mbè ná'vindí.

³⁰ Mbíri tè'é tí ndâ 'duù tí nó náa yí cu 'bì wó mítí ndú sàà kùro gî nô, yí delè gii bàkà ndâ 'duù tí nó náa yí tè'é tí ndú tí ndâ 'duù jáá kùro wó, bìndi yí gii te banga mítí ndâ 'duù tí nó náa yí bàkà ndú tí ndâ jáá 'duù á kùro wó nô.

Mbíri kù zè ndoo nìkì maa ta rẹ̀ mì Bìndi-Mbíri

³¹ À má éno, ndoo kpónó 'ví 'dè gítí ña ñìnò a ña có yè? Có mì Mbíri má toko a i ta có mì ndoo, a 'di ká bà jòò gbí có ta ndoo?

³² Mbíri táánò lê má je 'Viì mì wó ji ku tacó tí ndoo gî, bà je ndâ tó i ñìnó náa à 'dáá kuu mì wó nó ji ndoo bà kpò yí gí?

³³ A 'di ká bà kpì ngbàngà tí ndâ 'duù mì Mbíri náa yí cu 'bì wó mítí ndú nó? A Mbíri ká njaanga wú 'do tí miri ndú gî;

³⁴ a 'di ká bà waa có mítí ndú? A Bìndi-Mbíri tí Jézù ká bà waa có mítí ndú? Ngé lá! Tacó a yí táánò ká cì tacó tí ndoo, bìndi yí gii 'vala ndi wó 'do gbí muu'dú wó gî, yí kpónó kù ki tí wó tí bàndò náa à kù te duù mítí ngé ndii gî á rẹ̀gbà tí Mbíri, kù 'deke tí wó ji Mbíri tacó tí ndoo.

³⁵ A 'di ká bà njèè gbí òkò tí ndoo ta Bìndi-Mbíri tí mbe zè ndoo nìkì maa? A gbolò sé'i wèè, a 'bí ña i ká kù pèembí ndoo wèè, a bà mèkè'i tí ndoo wèè, a làngàwìrì wèè, a yè bongo wèè, a vò i wèè, a ku?

³⁶ Á go có tí nó náa à cu mí gbí wáràgà mì Mbíri éno máa,

«À kù ziki ze ta ri 'dáá gî tacó tí lo;
à kù bàkà i gítí ze go i gítí ndâ rómbo
náa à kù ya ta ndú gí bà waa ndú,» nô.

³⁷ Káa ta ndâ ña ñìnò 'dáá gî, ndoo co gbí ñò ndâ vò i tí nò go tàsà ndoò nó ta ɾè mì 'duù tí nó mbe zè ndoo ñìkì maa nô.

³⁸⁻³⁹ Tacó ye ñò ni ngbárángà'i éno gî, máa, wotí mì ku gítí bà njèè gbí òkò tí ndoo ta Mbíri tí mbe zè ndoo ñìkì maa ta ɾè mì Bìndi-Mbíri tí Jézù tí Mbe tí ndoo nò wálá; wotí mì 'wálá gítí wálá, wotí mì ndâ basìlì gítí wálá, wotí mì ndâ 'bí bèri mbe kù jòò gbí có ta Mbíri gítí wálá, wotí mì ndâ i ñìnó náa ndú kpónó kuu tí nó ta ndâ ñìnó kèjì nó gítí wálá, wotí mì 'bí i muu kùro to tí nó ta wotí mì 'bí i tà ngo gítí wálá, wotí mì 'bí i 'do gbí òkò tí ndâ i tí nó 'dáá gî náa Mbíri suu ndú nó gítí wálá.

9

Mbíri cu 'bì wó mítí ndâ Ìzìrìyélì

¹ Có tí nó náa ye kpónó kù 'dè nó a yúco; ye a 'duù mì Bìndi-Mbíri, ye 'dè 'véɾè lá, Bèri-mì-Mbíri delè kù 'dè có gbí njembí ye, máa, ye kù 'dè me 'véɾè lá.

² Sé có ba ɾé ye gî, njembí ye delè ta o 'dáá gî ká ɾo wu tacó tí ndâ nambe ye tí ndâ Ìzìrìyélì, tí ndâ 'dóó òò ye, tí ndâ mbelè ye.

³ Tacó Mbíri kùtàá má ì njà mítí ye, wàa yí 'ví mò ye 'do tí Bìndi-Mbíri gî tacó tí ndú, tàkòcò ye bà peteke ma.

⁴ Mbíri táánò cu 'bì wó mítí ndú á 'do gbí òkò tí ndâ 'duù, bìndi yí gii bàkà ndú tí ndâ 'vii mì wó, ndú táánò kù dù gbí ngba Mbíri, Mbíri táánò njù mùkà ta ndú, Mbíri táánò je ndâ có mì wó

a i ji ndú, ndú táánò a ndâ cèe mbe ùlù Mbírì, Mbírì delè táánò ci ndâ cí mì wó a i ji ndú.

⁵ Ndâ bu ndú a ndâ Àbìráámò, ta Ìzákò, ta Jákóbè, tí ndâ ɽèngbó mbe jò Bìndi-Mbírì tí 'duù gí muu to tí nò. À ùlù Mbírì tí gba tí ndâ i 'dáá gí dúú bà ya tí ! Go-i-tí-nò.

⁶ Ye kù 'dè me có máa có mì Mbírì co to gí nò lá. Tacó ndâ 'duù tí nò 'dáá gí náa ɽèngbó ndâ mbe jò ndú a Ìzìrìyélì nó 'dáá gí me ndâ cèe Ìzìrìyélì lá,

⁷ ndú delè 'dáá gí me ndâ yúcó 'viì mì Àbìráámò tacó náa Àbìráámò a ɽèngbó mbe jò ndâ bu ndú nò lá. Tacó kòcò Mbírì táánò ji Àbìráámò éno máa, «A Ìzákò ká bà jò ɽè lo.»

⁸ Gbí có tí nò éno máa, à kù nì 'viì mì Mbírì mítí 'duù me ká gítí ɽè bà jò yí mì Àbìráámò cuki lá; à kù nì a i mítí ndâ 'viì tí nó náa Mbírì ci Àbìráámò gítí ndú nò.

⁹ Tacó cí tí nó náa Mbírì táánò ci ta Àbìráámò nó éno máa, «Ta o tí nó náa ye bà dele ndi ye nó, nawù lo Sarà bà jò 'viì-'dakò.»

¹⁰ À me káa gbèe cí tí nó lá; ta o tí nó táánò náa 'dakò tí nó gbaànjé, tí Ìzákò, tí ká gù ndoo, tè ta nakáyì ndâ njemí mítí nawù wó Rèbékà nó,

¹¹⁻¹² Mbírì gii 'dè có ji Rèbékà si yí ta nakáyì tí wó máa, «'Duù nìnó náa a yí ká bà nò ɽo ɽi kùɽo ji ka wó 'do gbí òkò tí ndâ njemí tí nò á gbí yì lo nò nó bà dù tí bòò mì nìnò bà tè gí tàkò wó nò.» Mbírì 'dè có tí nó si ndâ 'viì tí nó gbì yì nawu ndú nò bàkà tó i gbaànjé lá, ndú delè bàkà vò i gbaànjé lá, tacó bà tùbà máa, Mbírì kù cu 'bì

wó mí tí 'duù 'do ká gbí 'dóó có mì wó náa à gbí njembí wó tí Mbíri, yí kù bàkà me 'do gbí kà có 'bí ña i náa 'duù bàkà nò lá.

¹³ Á go có tí nó náa à cu mí gbí wáràgà mì Mbíri, máa, «Ye táánò zè Jàkóbè ñìkì ma, káa ye sogo Èzàwú,» nô.

¹⁴ À má éno, ndoo kpónó 'ví 'dè có máa yè? Ndoò 'dè có máa, Mbíri a mbe waa có ta 'véřè, wàà? Ngé lá!

¹⁵ Tacó kòcò Mbíri jì Mòze éno máa, «Ye bà bàkà nambeè jì 'duù ñinó ta go bà bà bàkà nambeè jì yí tí ye, bìndi ye delè bà ñò yê ọ 'duù ñinó ta go bà ñò yê ọ wó tí ye.»

¹⁶ À má éno, Mbíri kù bàkà nambeè jì 'duù me tacó máa a go nambeè ta yí ká tí 'duù tí nò nò lá, yí delè kù bàkà me tacó máa 'duù tí nò bàkà nèté tí kpoò nò lá, yí bàkà 'do ká gbí 'dóó nambeè mì wó.

¹⁷ Tacó à cu mí gbí wáràgà mì wó tí Mbíri máa, yí 'dè có jì gbolò gba Másiři, máa, «Ye táánò bàkà wò tí gbolò 'duù tacó bà túbà wotí mì ye, delè tacó wàa řè ye 'ví wu cee muu to tí nó 'dáá gí.»

¹⁸ À má éno, à káa có mì Mbíri bà bàkà nambeè jì 'duù, à delè káa có mì wó bà bàkà 'duù tí mbe ngbútù.

Ndâ kpo-tàkòcò ta nambeè mì Mbíri

¹⁹ 'Bí 'duù 'do gbí òkò tí yo má 'vee ye máa, «Káa Mbíri kù pà nje ndâ 'duù tacó yè, lê náa yí ñò ñi gí máa, 'bí 'duù ta wotí bà 'bee muu có ta yí tí wó wálá nó?»

²⁰ Ye delè bà 'vee yo máa, « <'Duù tà a yè, wàa yí 'ví 'visì ta có gí tàkò có mì Mbíri?> Nje kàřà

kuu tí wó tacó bà 'vee mbe suu yí, máa, <Wó suu ye éno ta có yè wè?> »

²¹ À káa có mì muu-kàrà gbí njembí wó bà suu tú mì wó tí ngbúrú, à delè káa có mì wó bà suu tí sòrò.

²² Áá kùtàá má tí Mbírì a go bà tùbà kpo-tàkòcò mì wó, delè ta go bà tùbà wotí mì wó, wàa yí 'ví mii ndâ 'duù tí nó mbe kù kpolo tàkòcò wó nó gî, a 'di ká bà 'dè có ta yí? Káa ta ndâ ña ñinò 'dáá gî, yí kù zèè njembí wó kù 'vala ta ndâ 'duù tí nò,

²³ tacó bà tùbà ña ngba wó tí nó náa yí kù tò mí muu ndoo tí ndâ 'duù tí nó náa yí kù bàkà nambeè jì ndoo nò, ndoo tí nó náa yí 'viindi bàndò mí gbí ngba wó kù ù ta ndi ndoo sàà gî nò.

²⁴ Tacó ndoo a ndâ 'duù mì wó náa yí tè'è tí ndoo, me cuki 'do ká gbí òkò tí ndâ Jùdèyà lá; ndâ 'bí 'duù náa yí tè'è tí ndú gbí òkò tí ndoo a ndâ Jùdèyà, ndâ 'bí 'duù 'do gbí òkò tí ndoo a ndâ 'duù ñinó náa ndú me ndâ Jùdèyà lá.

²⁵ Ñinó a kòcò Mbírì náa Òsíyà, tí mbe 'dòkò có mì Mbírì, cu mí gbí wáràgà mì wó máa, Mbírì máa,

«Ye bà 'dè có jì ndâ 'duù tí nó náa ndú táánò me ndâ 'duù mì ye lá nó,
máa ndú a ndâ 'duù mì ye;
bìndi ye bà 'dè có jì ndâ 'duù tí nó náa ye táánò zè ndú ñikì lá nó,
máa ye zè ndú ñikì ma.

²⁶ Káa tí bàndò tí nó náa ye táánò 'dè có jì ndâ 'duù máa,
<Yo me ndâ 'duù mì ye lá> nó,

ye bà 'dè có ji ndú máa,

«Yo a ndâ 'viì mì wu Mbírì.»

27 Káa Ízáyà, tí mbe 'dòkò có mì Mbírì, táánò 'dè có gítí ndâ Ìzìrìyèlì máa,

«Kpètí ndâ 'viì kòtí Ìzìrìyèlì má jò àdì go nji ngoò gbí pù ngo,

Mbírì bà 'vala 'do gbí òkò tí ndú me ndâ 'duù me mbè lá;

28 tacó Mbírì bà bàkà kpìkì-kpìkì gítí bà waa có mítí ndâ 'duù muu to tí nó ta wotí ká tí nò wálá.»

29 Ízáyà delè táánò giì 'dè 'bí có máa,

«Mbe tí ndoo, tí mbe wotí, táánò má nò yê ọ ndoo,

wàa yí 'ví si sè njò ndâ 'viì ji ndoo lá,

àá táánò bà o gbí mòòkò bìndi ndoo káa kùlè,

go ọa í tí nó táánò mbe bàkà tí gbí ndâ gbata Sòdómà ta Gòmórà nò.»

30 Ndoò kpónó 'ví 'dè máa yè? Ndâ 'duù tí nó táánò mbe nò dúú kpokèjì bà bàkà nambeè ta Mbírì lá nó kpónó gí tí ndâ 'duù jáá kùro Mbírì, 'do gbí có bà tee njembí ndú mítí Bìndi-Mbírì gí.

31 Káa ndâ 'duù mì Mbírì ká kpécè kù ọ ndi có mì Mòze tacó bà bàkà ndú tí ndâ 'duù jáá kùro Mbírì, káa ndú pasuluku 'do tí bà dù tí ndâ 'duù jáá kùro Mbírì gí.

32 Ndú táánò 'de bà dù tí ndâ 'duù jáá kùro Mbírì lá tacó yè? Ndú táánò 'de lá, tacó ndú táánò kù pà me ta bà tee njembí ndú mítí Mbírì lá, ndú pà a i ta bà bàkà ndâ nèté. Ndú táánò tò kò ndú ta díí tí kpokèjì,

33 á go có tí nó náa à cu mí gbí wáràgà mì Mbířì maa, Mbířì maa,
 «Yo kpolo tí yo,
 tacó ye kù te díí náa ndâ 'duù bà tò kò ndú
 tí mítí kpokèjì gbí gbata Zìyónì,
 tí díí mbe 'va ndâ 'duù mí to;
 káa áa bà te nô mí ọ 'duù ñìnó mbe ùnje gítí wó
 gí nó wálá.»

10

¹ Ndâ ná'vindí! I ñìnó ta có gbí njembí ye, náa ye kù 'deke ta tí ye jì Mbířì kpolo ma tacó nó, a ñìnó maa, yí 'ví 'vala ndâ 'dóó 'duù mì ye 'do gbí ndâ vò i.

² Ye kù 'dè yúco muu ndú maa, có tí Mbířì gbí njembí ndú ngé ndii gí, káa, ndú ñò dúú kpokèjì bà bàkà nambeè ta Mbířì ni kálásê.

³ Ndú gířì'o 'do tí jáá kpokèjì tí nó mì Mbířì nó gí; ndú gíi da a 'dóó ngú kpokèjì mì ndú. Ndú biya bà co tí jáá kpokèjì tí nó mì Mbířì nó gí.

⁴ Káa Bìndi-Mbířì kpónó zi nje có mì Mòze gí, tacó bà njaanga ndâ 'duù ñìnó 'dáá gí mbe kù tee njembí ndú mítí wó tí Bìndi-Mbířì nô.

'Válá mì Mbířì a i tacó tí ndâ 'duù 'dáá gí

⁵ Mòze cu mí gbí wáràgà mì wó maa, 'duù ñìnó mbe kù dù tí 'duù jáá kùro Mbířì 'do gbí bà 'di có mì yì tí Mòze nó, bà 'vala 'do gbí có tí nó.

⁶ Káa có ñìnó náa à 'dè gítí bà dù tí 'duù jáá kùro Mbířì 'do gbí bà tee njembí wó mítí Bìndi-Mbířì éno maa, «A 'di ká bà da bèngbà mítí ọ tacó bà 'dò ya gí bà gí ta Bìndi-Mbířì 'do gbířì gí muu to tí nó?

7 Yo delè 'ví koṛo có máa, <A 'di ká bà ya gí tà to gí bà te Bìndi-Mbírì tí wuù 'do gbí guù ku wó gí sè?> »

8 Káa gbí có tí nò máa yè? Gbí có tí nò máa, có mì Mbírì ká dê ta yo, à ká kuu nje mè yo, à delè kuu gbí njembí yo. Có tí nò a có bà tee njembí mítí Bìndi-Mbírì, náa ze kú ma nô.

9 Tacó yo má 'dè có ta nje yo máa, Jézù a Mbe tí yo, bìndi yo gii ùnje ta njembí yo máa, Mbírì 'vala ndi wó 'do gbí muu'dú wó gí, Mbírì bà 'vala yo 'do gbí ndâ vò i gí.

10 Tacó Mbírì kú bàkà 'duù tí jáá 'duù kùro wó tí Mbírì 'do gbí có bà tee njembí 'duù tí nò mítí Bìndi-Mbírì. Bìndi yí gii 'vala 'duù 'do gbí vò i 'do gbí bà 'dè yúco máa, Jézù a Bìndi-Mbírì.

11 Á go có tí nó náa à cu mí gbí wáràgà mì Mbírì máa, «Á bà te nô mí ɾo 'duù ñinó mbe kú tee njembí wó mítí Bìndi-Mbírì nó wálá,» nô.

12 Tacó 'bè gbí òkò tí ndâ Jùdáyà ta ndâ ña ndâ 'duù ñinó náa ndú me ndâ Jùdáyà lá nó wálá; gbèè Mbírì tí nó tí Mbe tí ndâ Jùdáyà nó, delè káa Mbírì tí Mbe tí ndâ 'duù ñinó náa ndú me ndâ Jùdáyà lá nô, tí gbèè Mbírì tí nó mbe kú cù 'dè ngo cù wó mítí ndâ 'duù tí nó 'dáá gí mbe kú nì «Ákoo» ji yí nô.

13 Tacó Mbírì bà 'vala ndâ 'duù tí nó mbe kú 'deke tí ndú ta rè wó nó gbaànjé-gbaànjé 'dáá gí.

14 Káa ndâ 'duù bà nì «Ákoo» ji Mbírì á ta kpokèjì ngayi, náa ndú má ùnje gítí wó lá? Ndú delè bà ùnje gítí wó ta ña kpokèjì ngayi, náa ndú jé má 'di có tí wó lá? Ndú bà 'di có tí wó ta ña

kpokèjì ngàyi, náa 'bí 'duù mbe ma có tí wó jì ndú má wálá?

¹⁵ Ndú delè bà ma có tí wó jì ndâ 'duù ta ña kpokèjì ngàyi, sè káa ñinó à má tuu ndú túú-tuu? Á go có tí nó náa à cu mí gbí wáràgà mì Mbíri, máa, «Banga tí bà gí ndâ mbe ma Banga-Ngú-Có gé ndii gí!» nô.

¹⁶ Kpèti ká éno, à me ndâ 'duù 'dáá gí táánò ká ùnje gítí Banga-Ngú-Có lá; tacó Ìzáyà tí mbe 'dòkò có mì Mbíri táánò 'vee Mbíri máa, «A 'di ká ùnje gítí có tí nó náa ye ma jì ndú nó, Mbe tí ye?»

¹⁷ À má éno, bà tee njembí 'duù mítí Bindi-Mbíri gí a i 'do tí có tí nó náa yí 'di nô, káa có tí nó náa yí 'di nò gí a i ta bà ma có gítí Bindi-Mbíri.

¹⁸ Káa 'vé mì ye a ñinó máa, ndâ Ìzìriyéli táánò 'di có tí nó náa ndâ mbe 'dòkò có mì Mbíri ma nó lá, wè? Ndú 'di gí! Tacó à cu mí gbí wáràgà mì Mbíri éno máa,

«Kòcò ndú ya cee muu to tí nó gí.

Ndâ 'duù muu to tí nó 'dáá gí 'di ndâ có mì ndú gí.»

¹⁹ 'Bí 'vé mì ye káká'i a ñinó máa, ndâ Ìzìriyéli 'di gbí có tí nó náa ndâ mbe 'dòkò có mì Mbíri ma jì ndú nó gí, wè? Mòze dígísèé a kpédélé 'duù mbe 'visì có gí tàkò có tí nó, éno máa, Mbíri máa, «Ye bà bàkà yo 'ví tò kiì ta ndâ 'duù ñinó ta ñe ña ndú wálá nô.

Ye bà bàkà ndâ 'duù ñinó ta gbí có mì ndú wálá nó 'ví kpolo tàkòcò yo.»

²⁰ Bindi , Ìzáyà gù 'dè có ta gúku tí wó wálá, máa, Mbíri máa,

«À 'de ye a ndâ 'duù ñìnó mbe pà bà tí ye lá.
Ye tùbà tí ye a i ji ndâ 'duù ñìnó mbe 'vee bà tí
ye lá,» nô.

²¹ Káa yí gii 'dè có gítí ndâ Ìzìrìyélì, máa, Mbírì
máa,
«Ye kù tù 'bì ye 'do tí bà co ɾi, yee tí bà ta ɾi, ji
ndâ tù-ká-kpò-có tí ndâ mbe kù jòò gbí có
ta ye.»

11

Mbírì biya ndâ 'duù mì wó tí ndâ Ìzìrìyélì lá

¹ Ye kpónó kù 'vee a 'vé, máa, Mbírì 'visì a
kapí wó á gítí ndâ 'duù mì wó tí ndâ Ìzìrìyélì
wè? Gbaànjé lá! 'Dóó ye kuu nó a Ìzìrìyélì, tí
'viì-gù Àbìráámò. Ye a 'viì kòtí Bènjàmínò.

² Mbírì 'visì kapí wó gítí ndâ 'duù mì wó náa
yí cu 'bì wó mítí ndú á 'do tí o bà 'bità bà suu
to tí nó nó lá. Yo 'deke có tí nó náa à cu mí gbí
wàràgà mì Mbírì gítí bà 'dè kòlòwò mì Èlìjà tí
mbe 'dòkò có mì Mbírì, ji Mbírì gítí ndâ Ìzìrìyélì
nó lá?

³ Èlìjà 'dè kòlòwò gítí ndâ Ìzìrìyélì ji Mbírì máa,
«Ndú mì ndâ mbe 'dòkò có mì lo léé gí, sè káa
ye ta kpéétí ye, káa ndú delè kù pèè ta bà zi ye,
Mbe tí ye! Ndú delè uu gbí ku-sòrò bà ci i ji wò
'dáá gí.»

⁴ Káa Mbírì gii 'visì có ji Èlìjà máa yè? Mbírì
gii 'visì có ji yí máa, «Ye kù kpolo tí ndâ 'duù
7,000 mbe ùlù sú mbírì tí nó ta ɾè wó a Bààlì lá
nó tacó tí ye.»

⁵ Gbèè ña i tí nò wúnó bàkà tí gî, làmbu sè gbí ndáá ndâ Ìzìrìyélì gbaànjé-gbaànjé náa Mbírì cu 'bì wó mítí ndú ta nambeè mì wó kuu tí .

⁶ Mbírì cu 'bì wó mítí ndâ 'duù tí nò ta nambeè mì wó, yí cu 'bì wó mítí ndú me tacó máa ndú bàkà a tó i ji yí nò lá, tacó Mbírì táánò má cu 'bì wó mítí ndú tacó ndâ i ñínó náa ndú bàkà nó, rẹ ña nambeè tí nò bà dù me nambeè lá.

⁷ Nò wàa yè? Nò wàa, ndâ Ìzìrìyélì 'de i tí nó náa ndú táánò kù bàkà nèté tacó nó lá. A ndâ 'duù tí nó mbe me mbè lá, náa Mbírì cu 'bì wó mítí ndú nó ká 'de , káa tù sè ndâ 'bí 'duù gbí òkò tí ndú yoo 'do tí bà 'di é mì Mbírì gî;

⁸ á go có tí náa à cu mí gbí wáràgà mì Mbírì máa,
«Mbírì je muu ji ndú lá.

Mbírì yoo ọo ndú 'do tí bà ñò ndâ i gî,

Mbírì de tù ndú 'do tí bà 'di có gî yee gbí ọi tí nó wúnó,» nô.

⁹ Bìndi kòcò Dàvídè tí gbolò gba mì ndâ Ìzìrìyélì gii 'dè có máa,

«Bàndò bà zò i mì ndú 'ví dù tí wú náa à lè ji ndú,

bàndò bà zò i mì ndú 'ví dù tí bù náa à duu ji ndú,

à 'ví dù tí bàndò bà eendi ndú gítí vò i,

à 'ví dù tí bàndò bà waa có mítí ndú,

¹⁰ ọo ndú 'ví di gî, wàa ndú 'ví ñò i lá,

ndòpí ndú 'ví loko ta du vò i ká dúú bà ya tí .»

¹¹ Ye kpónó kù 'vee 'bí 'vé káká'i, «Ndâ Ìzìrìyélì kpónó 'va nò a tí ndú to ngbé gî, wèè, ndú tò káa kò ndú sínò?» Gbaànjé lá! Tacó a bà 'va tí ndâ

Ìzìrìyélì to nò ká si Mbírì 'ví 'vala ndâ 'duù ñìnó mbe ñò dúú kpokèjì bà bàkà nambeè ta Mbírì ni lá nó 'do gbí ndâ vò i mì ndú, tacó wàa, ndâ Ìzìrìyélì 'ví tò kii ta ndú.

¹² Káa vò i mì ndâ Ìzìrìyélì má si Mbírì 'ví bàkà tó i me gbolò ji ndâ 'duù muu to tí nó 'dáá gî, bìndi bà pasi bà 'di có mì Mbírì mì ndú má si Mbírì 'ví bàkà tó i me gbolò ji ndâ 'duù ñìnó mbe ñò dúú kpokèjì bà bàkà nambeè ta Mbírì ni lá nó, ña tó i tí nó náa Mbírì bàkà ji ndâ 'duù nó bà me gbolò go ña yè, náa ndâ Ìzìrìyélì 'dáá má 'di có mì Mbírì delè gî nò!

¹³ Ye kpónó kù 'dè có a i ji yo tí ndâ 'duù tí nó ta ña yo me ndâ Ìzìrìyélì lá nó, tacó Mbírì tuu ye a i ji ndâ 'duù tí nó ta ña ndú me ndâ Ìzìrìyélì lá nò. Ndi 'dì tí nje ye gítí nèté mì ye wálá,

¹⁴ tacó wàa, ndâ nambe ye tí ndâ Ìzìrìyélì 'ví tò ta kii ta yo, tacó wàa, ndâ 'bí 'duù 'do gbí òkò tí ndú 'ví 'de ta 'válá.

¹⁵ Tacó bà bè bà toko nambeè mì Mbírì ta ndâ Ìzìrìyélì má gî a i ta bà 'viindi nambeè gbí òkò tí Mbírì ta ndâ 'duù muu to tí nó 'dáá gî, bà ùnje bà toko nambeè ta ndú mì Mbírì bà je a ña yè ji ndâ 'duù? Áá bà gî a i ta 'válá ji ndâ ku!

Mbírì bà 'vala ndâ 'duù ñìnó náa ndú me ndâ Ìzìrìyélì lá nó gî

¹⁶ À má ci muu njú kpédélé'i ji Mbírì gî, sè njú tí nò 'dáá gî a ñindi Mbírì. À má ci ndâ teè mù ji Mbírì gî, sè ndâ nè 'bì mù tí nò 'dáá gî a ndâ i mì Mbírì.

¹⁷ Káa à kpónó má waaka ndâ 'bí wú bè 'dê cii gî, bìndi àá giì nanaka yo ndâ 'bí dó bè ju cii tí nó náa à waaka 'do gbí jìlì nó mí bìndi ndú,

¹⁸ yo 'ví me tí yo máa yo ma á ji ndâ wú bè 'dê cii tí nó náa à waaka ndú gí 'dè nó lá. Káa yo má me tí yo, yo 'ví te mí gbí muu yo éno máa, yo kú 'vala me 'do tí 'dóó teè yo lá.

¹⁹ Yo má 'dè có éno máa, «Áá táánò waaka ndú tacó bà ɾò ze mí bìndi ndú,»

²⁰ a yúcó; àá táánò waaka ndú 'do gbí ngbútù mì ndú. Káa yo kú ɾò tíyò tí kpoò ká tacó yo kú tee njembí yo mítí Bìndi-Mbíɾì. Á má éno, yo 'ví mòò ɾo yo lá. Yo dù ta gúku Mbíɾì tí yo.

²¹ Tacó yí táánò lê má waaka ndâ 'dóó bè 'dê cii tí nó gí to gî, yí delè bà si yo wálá.

²² Yo te mí gbí muu yo éno máa, Mbíɾì a mbe nambeè, yí delè a 'duù ñìnó ta 'dì á nje wó wálá; yí ño 'dì ta bà waa có mítí 'duù ñìnó mbe 'di có mì wó lá nó lá, káa yí kú bàkà nambeè á ji yo, náa go nambeè ta yí má ká kpòò kuu tí yo nó. Káa go nambeè ta yí má tí yo wálá, yí bà mò yo á 'do tí wó gî.

²³ Káa ndâ Ìzìrìyèlì má si ngbútù mì ndú mí to gî, Mbíɾì bà dele ta ndú á gí bàndò mì ndú gî, tacó wotí bà dele ta ndú káká'i gí bàndò mì ndú kuu tí wó.

²⁴ Tacó àá táánò má waaka yo tí ndâ ju cii 'do tí 'dóó ɾèngbó yo gbí jìlì, bìndi àá giì nanaka yo mítí bè 'dê cii tí nó náa à ɾò mí gbí po ñjì nó gî, bà nanaka ndi ndâ nè'bì 'dê cii tí nó náa àá táánò waaka ndú nó mítí 'dóó bàndò mì ndú bà dù a dê có gé ndii gî.

Mbíri nò yê ro ndâ 'duù 'dáá gí

²⁵ 'Bí có gbí ngàngbùùtù náa ye kpónó bà 'dè ji yo tacó wàa yo 'ví si ta tí yo máa yo ma nò lá, a ñinô, ndâ ná'vindí: ndâ Ìzìriyélì bà bàkà ngbútù me ká dúú bà ya tí lá, ndú bà bàkà yee ká tí o tí nó náa ndâ 'duù ñinó náa ndú me ndâ Ìzìriyélì lá nó má gí 'dáá gí mì Mbíri má kózò gí,

²⁶ bìndi Mbíri bà gii 'vala ndâ Ìzìriyélì 'dáá gí. Á go có tí nó náa à cu mí gbí wáràgà mì Mbíri máa,
«Mbe 'vala ndâ 'duù bà gí 'do Ziyóni;
yí bà 'vala ndâ 'viì-gù Jàkóbè 'do gbí ndâ vò i 'dáá gí.

²⁷ Ñìnò bà dù a o bà njù mbelè mì ye ta ndú,
náa ye má 'vala ndú 'do gbí ndâ vò i mì ndú gí,» nô.

²⁸ Ndâ Ìzìriyélì biya bà 'di Banga-Ngú-Có gí, tacó éno, ndú gí tí ndâ ku'dì tí Mbíri 'do gbí có mì yo. Káa à má gítí có bà cu 'bì Mbíri mítí ndú, ndú kpòò káa ndâ wú-gbì-ṛé Mbíri ta ṛè mì ndâ ká gù ndú.

²⁹ Tacó Mbíri me mbe kú 'vèè gbí nje 'duù tacó i lá; yí delè má cu 'bì wó mítí 'duù gí, yí káká'i 'visì muu wó 'do tí 'duù tí nò lá.

³⁰ À má gítí yo tí ndâ 'duù tí nó mbe nò dúú kpokèjì bà bàkà nambeè ta Mbíri ni lá nó, yo táánò kpò có mì Mbíri gí, káa Mbíri kpónó kú bàkà nambeè ta yo, tacó ndâ Ìzìriyélì táánò kpò có mì wó gí.

³¹ Ndâ Ìzìriyélì delè kpónó kú kpò có mì Mbíri, tacó wàa Mbíri 'ví bàkà ta nambeè ji ndâ yì, á

go ñìnó náa yí táánò bàkà ji yo ta o tí nó náa yo táánò kpò có mì wó gî nô.

³² Tacó Mbířì zèè ndâ 'duù muu to tí nó 'dáá gî mí gbí zàà mì kpò-có, tacó wàa yì 'ví bàkà nambeè ji ndú.

À ùlù Mbířì

³³ Ndâ i mì Mbířì me gbolò ngé ndii gî, yí a mbe 'di gbí-o, muu tí wó delè ngé ndii gî! A 'di ká bà ni bà 'dè gbí ndâ có mì wó náa yí eře gba ndú gî nó? A 'di ká bà 'di gbí ndâ kpokèjì mì wó? Á go có tí nó náa à cu mí gbí wáràgà mì wó máa,

³⁴ «A 'di ká 'di gbí có gbí njembí Mbe tí ndoo?

A 'di ká kpo-gbí-tà-tù wó?

³⁵ A 'di jé ká je i-nambeè ji yí,

wàa yí 'ví ko ta mboo i mì 'duù tí nò?»

³⁶ Tacó a yí ká suu ndâ i 'dáá gî, ndâ i 'dáá gî kù dù 'do gbí có mì wó, ndâ i 'dáá gî delè á tacó tí wó. À ùlù yí kpòò ya tí . Go-i-tí-nò.

12

Yo 'vala ta bà bàkà nèté ji Mbířì

¹ À má éno, ye kù 'deke a tí ye ji yo, ndâ ná'vindí, máa, yo yòò tí, yo tí ndâ wu i-cí-ci ji Mbířì, tí ndâ tó i náa Mbířì 'ví lì 'bì wó mí tà ndú, tacó ña gbolò nambeè mì wó náa yí bàkà ji yo nô. Ñìnò a ña cèè bà bàkà i ji Mbířì náa yo 'ví bàkà .

² Yo bàkà nèté ta có mì ndâ 'duù muu to tí nó lá, yo si Mbířì 'ví 'visì bà kořo có mì yo tí ngú ña bà kořo có mbe 'visì cè ña bà bàkà i mì yo tí ngú bà bàkà i. Tacó wàa, yo 'ví ñò ta có mì Mbířì ni ,

yo 'ví ñò ta tó i mì wó ni , yo delè 'ví ñò ta i ñìnó mbe 'vii ɾo 'bá tí cèè i nó ni .

³ A nambeè tí nó náa Mbíri bàkà ji ye nó ká si ye kù 'dè có ji yo gbaànjé-gbaànjé 'dáá gî, máa, 'bí 'duù 'do gbí òkò tí yo 'ví koɾo có máa, yì ma ndii bà gî nò lá. 'Duù 'ví koɾo có lèè, 'vii ta wotí bà tee njembí wó mítí Mbíri, náa Mbíri je ji yí,

⁴ jé ká go ñìnó náa ndâ bà to tí ndoo me mbè, káa bà to ñìnò ká ta tende ña nèté mì wó nò.

⁵ Káa ndoo, kpétí má me mbè, ndoo a ndâ bà to tí Bìndi-Mbíri, náa à 'deeke 'duù ñìnò mítí ndâ tende bàndò tí kútí gbèè 'duù.

⁶ Mbíri njèè ndâ i-nambeè mì wó ji ndoo gbaànjé-gbaànjé 'dáá gî tende-tende, 'vii ká ta nambeè mì wó náa yí bàkà ji ndoo, tacó bà bàkà ta nèté.

À má éno, Mbíri má je ji 'duù a nèté bà ma có mì wó, 'duù tí nò 'ví ma có mì Mbíri 'vii ta wotí bà tee njembí wó mítí Mbíri, náa Mbíri je ji yí;

⁷ yí má je ji wò a bà bàkà nèté ndâ 'duù, wò 'ví bàkà nèté ndâ 'duù; yí má je wò a bà nìbà i ji ndâ 'duù, wò 'ví nìbà i ji ndâ 'duù;

⁸ yí má je ji wò a nèté bà je wotí ji ndâ 'duù, je wotí ji ndâ 'duù; yí má je ji wò a nèté bà je i ji ndâ 'duù, wò 'ví ñò ñó-ɾo-i gítí bà je i ji ndâ 'duù lá; yí má bàkà wò tí kùro ndâ 'duù, tè kùro ndú; yí má bàkà wò tí mbe nambeè, bàkà nambeè ji ndâ 'duù ta mbá-mbá tí lo.

⁹ Yo 'ví ze tí yo gbí òkò tí yo nìkì ta yúcó. Yo 'ví sogo wò i, wàa yo 'ví zèè i ñìnó tí tó i nó kácá-kácá.

10 Yo zè tí yo gbí òkò tí yo go i mì ndâ ná 'vindí gbí òkò tí ndú, yo delè 'ví dù ta go bà tègàrà tí yo gbí òkò tí yo.

11 Yo 'ví bàkà nèté tí kpoò, yo dù tí ndâ mbe kpó lá, yo bàkà nèté ji Mbe tí ndoo ta mbá-mbá tí yo.

12 Bà koṛo có mì yo lì mítí Mbíri 'ví si yo 'ví dù ta líkí'o tí yo, yo 'ví zèè njembí yo gbí ndâ vò o, yo delè 'ví 'deke tí yo ji Mbíri ta o 'dáá gî.

13 Yo 'ví je i-'bì yo tacó tí ndâ 'duù mì Mbíri ònínó tí ndâ mbe yê nô, yo delè 'ví te wiṛi mítí ndâ mbe 'dó-'do.

14 Yo 'ví cù 'dê ngo cù yo mítí ndâ mbe kù mèèkè'i tí yo; yo be ndú lá, yo cù 'dê ngo cù yo mítí ndú.

15 Ndâ 'duù má ta líkí'o tí ndú, yo 'ví dù ta líkí'o tí yo ta ndú; ndú má kù wa gbí, yo delè 'ví wa gbí ta ndú.

16 Ndâ 'duù 'dáá gî 'ví dù á ṛo yo 'vii ká 'vii, yo mba tí yo lá, yo nì kaà ta ndâ 'duù ònínó náa ndú me ndâ i lá nô, yo 'ví bàkà tí yo tí ndâ mbe 'dì gbí-o lá.

17 Yo 'ví ko mboo vò i ta vò i lá, yo koṛo có a i gítí bà bàkà i ònínó tí cèe i nó kùṛo ndâ 'duù 'dáá gî.

18 Yo bàkà wotí tacó bà 'vala ta ndâ 'duù 'dáá gî nìkì maa.

19 Yo 'ví kèèndè vò i lá, ndâ kómbe ye, yo si a kpo-tàkòcò mì Mbíri ká 'ví kèèndè vò i muu yo; a go có tí nó náa à cu mí gbí wáràgà mì Mbíri máa, Mbíri máa, «Bà kèèndè vò i a i mì ye, ye bà ko mboo vò i ta vò i,» nô.

20 À má éno, go má tí ndâ ku'dì tí yo, yo 'ví je

i-zó-zò ji ndú, go ngo má tí ndú, yo 'ví je ngo ji ndú; tacó yo má bàkà éno, ndâ vò i mì ndú náa ndú kù bàkà mító yo nò bà te nô mí ɾo ndú me gbolò.

²¹ Yo 'ví si vò i 'ví gèè bè wó mí muu yo lá, yo kpò muu vò i ta bà bàkà ndâ tó i.

13

Yo 'di có mì ndâ gba 'bá

¹ Yo 'dáá gí 'ví 'di có mì ndâ gba mbe kù zogo 'bá mì yo. Tacó a Mbíri ká je gba ji 'duù.

² À má éno, mbe kù jòò gbí có ta gba kù jòò nò a gbí có ta gba tí nó náa Mbíri le bèrè ji yí nô, káa ndâ mbe kù jòò gbí có kù pà a bà, bà waa có mì Mbíri mító ndú.

³ Tacó 'duù ñinó mbe kù co tí jáá kpokèjì nó cì gúku tí ndâ gba lá, a ndâ mbe bàkà vò i ká kù cì gúku tí ndâ gba. À má éno, yo co tí jáá kpokèjì, ndâ gba 'ví ùlù ta yo, delè tacó wàa yo 'ví cì ta gúku tí ndú lá.

⁴ Gba a bòò mì Mbíri, náa Mbíri je yí tí mbe kù koni yo, káa yo má bàkà vò i, yo 'ví cì gúku tí wó, tacó Mbíri le bèrè ji yí me sínò lá; yí a bòò mì Mbíri, mbe kù waa có mító ndâ mbe kù bàkà vò i á bìnɔ Mbíri.

⁵ À má éno, yo 'ví 'di có mì gba me ká cuki ji gúku bà waa có mì wó mító yo lá, yo bàkà tacó yo ñò ni gí, máa, ñinò a i ñinó náa à tí nó ká nò.

⁶ Ñinò delè a nderè có tí nó náa yo 'ví gò ta i muu 'bá nó ká nò, tacó ndâ mbe kù bàkà nèté muu 'bá 'dáá gí a ndâ mbe bàkà nèté mì Mbíri, mbe kù bàkà nèté yo.

⁷ À má éno, yo 'ví si ndâ có mì ndú 'do muu yo 'dáá gî; à má mì ndú muu yo a có bà gò i muu 'bá, yo gò 'do muu yo gî, à máa có bà sì muu ndâ 'dóó i mì yo, yo 'ví si gî, yo delè 'ví si ndú tí i ọ yo, yo delè 'ví tẹgàrà ndú.

Yo zè tí yo gbí òkò tí yo nìkì maa

⁸ Yo 'ví si i mì 'bí 'duù gbaànjé 'ví dù á muu yo lá; à 'ví dù á muu yo káa có bà zè tí yo gbí òkò tí yo nìkì maa, tacó 'duù ñinó mbe zè 'bí ka wó nìkì maa nó a mbe 'di có mì Mbírì.

⁹ Ndâ có mì Mbírì máa, «Wò 'ví bàkà bangbaya lá; wò 'ví zi 'duù lá; wò 'ví zingbà i lá; wò 'ví dù ta go i mì ndâ 'bí 'duù lá.» Káa ndâ có tí nó ta ndâ 'bí sè có mì Mbírì 'dáá gî toko gbaànjé bàkà a gbèe có tí nó máa, «Zè 'bí ka lo nìkì á go bà zè 'dóó tí lo nìkì mì lo,» nò.

¹⁰ 'Duù mbe zè 'bí ká wó nìkì maa bà bàkà vò i gítí ka wó nó wálá; à má éno, tó bà zè tí a bà 'di ndâ có mì Mbírì 'dáá gî.

¹¹ Yo bàkà éno, tacó yo ñò ni gî máa, o tí nó tí o bà ziya mì ndoo 'do tí ọ nó kpónó gí gî. Tacó o bà 'vala ndoo kpónó dooko ta ndoo cotí ñinó táánò ta kpédélé o bà ùnje mì ndoo gítí Bìndi-Mbírì nó gî.

¹² Kùro bà too yé dooko gî; à má éno, ndoo mò ndâ i tí nó náa ndoo bàkà gbí 'dí'di'o nó gí nje seè, wàa ndoo 'ví 'viindi tí ndoo á gítí ndâ nèté gbí ngba'o.

¹³ Ndoo 'viindi ndâ cè ọ bà bàkà i mì ndoo, wàa ndoo 'ví dù go ndâ 'duù ñinó mbe kù 'vala gbí ngba ọ; bà bàkà ndâ i 'vírímó-'vիրimo gbí 'dí'di'o káká'i wálá; bà sa ta pe káká'i wálá; có

gítí ndâ vo-vò ka sili, ta bà bàkà ndâ i ñìnó mbe 'vii ɾo 'bá lá nó káká'i wálá; bà gò gó ta bà 'dèèkè mà delè káká'i wálá; bà tò kii káká'i wàlà.

¹⁴ Káa yo 'ví si a Mbe tí ndoo Jézù tí Bìndi-Mbíri ká 'ví kpolo tí yo, wàa yo 'ví je mbí yo gítí ndâ vò i ñìnó mbe me líkí tí yo nó lá.

14

Waa có mítí ná'vindí lo lá

¹ 'Bí 'duù ñìnó ta wotí bà tee njembí wó mítí Bìndi-Mbíri me njí'dí tí wó nó má kuu gbí òkò tí yo, yo 'ví si yí, yo 'viiki gbí nje wó gítí ña bà koɾo có mì wó gítí ndâ ña i-zó-zò lá.

² Tacó a bà tee njembí 'bí 'duù mítí Bìndi-Mbíri ká kù si yí kù zò ña ndâ i 'dáá gî, káa 'duù ñìnó ta wotí bà tee njembí wó mítí Bìndi-Mbíri me njí'dí tí wó nó kù zò káa ndâ kpátùyâ.

³ Káa 'duù ñìnó mbe kù zò ña ndâ i 'dáá gî nó 'ví cònje gítí 'duù ñìnó mbe kù guu gbí i-zó-zò gúú-guu nó lá, wàa ndâ 'duù ñìnó mbe kù guu gbí i-zó-zò gúú-guu nó 'ví waa có mítí ndâ mbe zò i sàkàmàà nó lá, tacó Mbíri ùnje gítí wó gî.

⁴ Káa wò tà a 'di, wàa wò 'ví waa ta có mítí bòò mì 'bí 'duù? À ká gbí nèté mì mbe tí wó bà ñò máa yí kuu tìyò, à delè ká gbí nèté mì wó bà ñò máa yí 'va tí wó to gî. Káa yí bà ɾò tìyò gî, tacó wotí bà bàkà yí 'ví ɾò tìyò kuu tí Mbe tí ndoo.

⁵ 'Bí 'duù kù koɾo có máa 'bí ɾi gbaànjé ñikì co tí 'bí ɾi gî, káa 'bí 'duù kù koɾo có máa ndâ ɾi 'dáá gî 'vii ká 'vii. Káa 'duù 'ví eɾe muu wó ká mítí 'dóó có mì wó náa à gbí muu wó.

⁶ 'Duù ñìnó mbe kù kpolo tí 'bí ɾi tí kpóló-kpolo ɾi nó, bàkà éno tacó bà tègàrà Mbe tí ndoo. 'Duù ñìnó delè mbe kù zò i nó, kù zò tacó bà tègàrà Mbe tí ndoo, tacó yí kù 'dè ñìkì maa ji Mbíɾì tacó i-zó-zò tí nó náa yí kù zò nò. Káa 'duù ñìnó mbe kù guu gbí ndâ i-zó-zò nó, kù bàkà éno tacó bà tègàrà Mbe tí ndoo, yí delè kù 'dè ñìkì maa ji Mbíɾì.

⁷ Tacó 'bí 'duù gbaànjé 'do gbí òkò tí ndoo mbe kù 'vala gítí mɾì wó nò wálá, 'bí 'duù gbaànjé delè mbe cì gítí mɾì wó nò wálá.

⁸ Ndoò má kù 'vala , ndoo kù 'vala tacó tí Mbe tí ndoo, ndoo má kù cì , ndoo delè kù cì tacó tí Mbe tí ndoo. À má éno, ndoo máa wu ndoo, ndoo a ndâ i mì Mbe tí ndoo, ndoo máa ku ndoo, ndoo delè káa ndâ i mì Mbe tí ndoo.

⁹ Ñìnò a gbí nderé có bà cì Bìndi-Mbíɾì, bìndi yí giù 'vala ndi wó káká'i 'do gbí muu'dú wó nó ká nò, tacó wàa, yì 'ví dù tí Mbe tí ndâ 'duù ñìnó mbe cì gí nó ta ndâ wu 'duù.

¹⁰ À má éno, wò kù waa có mítí ná'vindí lo tacó yè? Wò kù cónje gítí ná'vindí lo tacó yè? Tacó ndoo 'dáá gí wúnò bà ɾò tíyò kùɾo jàlàmbà bà waa có mì Mbíɾì,

¹¹ tacó à cu mí gbí wáràgà mì Mbíɾì máa, kòcò Mbe tí ndoo máa,

«Ye má kù 'vala ,
 ndâ 'duù 'dáá gí bà kucuku muungbó ndú mí kùɾo ye,
 ndâ 'duù gbí ndâ tende ɲa nje có 'dáá gí bà ùlù Mbíɾì ta o tí nò.»

¹² Ndoò gbaànjé-gbaànjé 'dáá gí bà yù gbí tí ndoo ji Mbíɾì.

Dù tí nderè bà bàkà vò i mì 'bí ka lo lá

¹³ À má éno, ndoo si bà dù kù 'viiki tí ndoo gbí òkò tí ndoo mí to, yo koṛo có rò a i mítí bà bàkà 'bí ɲa i ɲìno mbe ga gbí kò 'bí ná'vindí yo lá, yo delè 'ví dù tí i ɲìno mbe kù nè kpokèjì mì wó nó lá.

¹⁴ Ye ɲò ni ngbárángà'i ta rẹ̀ mì Mbe tí ndoo Jézù gí, máa, 'bí i-zó-zò tí bẹ̀tí-i nò wálá, i-zó-zò a bẹ̀tí-i ká jì 'duù tí nó mbe kù koṛo có máa i-zó-zò tí nò a bẹ̀tí-i nò.

¹⁵ Njembí ná'vindí lo má òkò gítí ɲa i tí nó náa wò kù zò nó lá, wò kù 'vala ta yí me ta njembí bà zè Mbírì lá. Si ɲa i tí nó náa wò kù zò nó 'ví dù tí i mbe volo 'duù ɲìno náa Bìndi-Mbírì táánò cì tacó tí wó nó mí to.

¹⁶ À má éno, si ndâ 'duù 'ví 'dè vò có gítí i tí nó tí tó i-zó-zò mì lo nó lá.

¹⁷ Tacó kpóló-kpolo i mì ndoo tí ndâ 'duù mì Bìndi-Mbírì me bà zò i lá, kpóló-kpolo i mì ndoo delè me bà ɲù pe lá; kpóló-kpolo i mì ndoo a bà dù tí ndâ 'duù jáá Kùṛo Mbírì, ta bà dù ta 'dè njembí ndoo, gù je bà te líkí'o mì Bèrì-mì-Mbírì mítí ndoo.

¹⁸ 'Duù má bàkà nèté jì Bìndi-Mbírì gbí ɲa kpokèjì tí nò, tàkòcò Mbírì bà peteke gítí wó, ndâ 'duù delè bà si yí tí i.

¹⁹ À má éno, ndoo 'ví mòkò a tàkò i ɲìno mbe kù si gbí òkò tí ndoo 'ví dù òkò maa, gù je i ɲìno mbe si ndoo kù je wotí bà konì tí ndoo gbí òkò tí ndoo jì ndoo nò.

²⁰ Yo 'ví volo gbí nèté mì Mbírì tacó i-zó-zò lá. Ndâ i-zó-zò 'dáá gí a ndâ ngbárángà i, káa à lè

ji 'duù ñìnó mbe zò 'bí ña i mbe si 'bí ka wó 'ví bàkà vò i nô.

²¹ Yúcó a bà zò yâ lá, ta bà njù pe, delè ta bà bàkà i ñìnó mbe kú si 'bí ná'vindí yo 'ví bàkà vò i nó, lá.

²² Káa bà tee njembí yo kpónó mítí Mbíri nó 'ví dù tí có kóó gbí òkò tí yo ta Mbíri; káa 'duù ñìnó mbe nì nikaláká gítí bà bàkà i ñìnó náa yí ñò ni tí yúcó gî lá nó, a mbe tó pá.

²³ Káa Mbíri kú waa có a i mítí 'duù ñìnó mbe zò i ta njembí wó sósò'ò nô, tacó ña 'duù tí nò kú bàkà i me ta bà tee njembí wó mítí Mbíri lá, káa i ñìnó náa 'duù bàkà me ta bà tee njembí wó mítí Mbíri lá nó, a vò i.

15

Peteke tàkòcò ndâ 'bí ka lo, peteke me ká tàkòcò lo ta kpéetí lo lá

¹ Ndoó tí ndâ 'duù ñìnó ta wotí bà tee njembí mítí Bìndi-Mbíri kuu tí ndoo nó 'ví konì ndá 'duù ñìnó ta wotí bà tee njembí ndú mítí Bìndi-Mbíri me njí'dí tí ndú nó tà bà te ndâ du ká'i ñìndi ndú. Ndoó 'ví bàkà me káa i ñìnó mbe kú peteke tàkòcò ndoo nó cuki lá.

² Ndoó kùtáá 'dáá gî bà bàkà i ñìnó mbe kú peteke tàkòcò ndâ 'bí ka ndoo, ta bà konì ndú gítí bà 'de wotí gítí bà tee njembí ndú mítí Bìndi-Mbíri.

³ Tacó Bìndi-Mbíri táánò koṛo có me ká gítí 'dóó miṛi wó cuki lá; á go có tí nó náa à cu mí gbí wáràgà mì Mbíri máa, «Ndâ 'duù tí nò mbe kú go yo nò kú go a ye,» nô.

⁴ Káa ndâ có tí nó 'dáá gî náa à cu táánò sàa mí gbí wáràgà mì Mbírì nó, a i tacó bà je muu jì ndoo; tacó wàa, wáràgà mì Mbírì 'ví je bà zèè njembí, ta wotí bà koṛo có lì mítí Mbírì jì ndoo.

⁵ Ye kû 'deke tí ye jì Mbírì tí mbe kû je bà zèè njembí, delè tí mbe kû je wotí jì ndâ 'duù, máa, yí 'ví si yo 'ví 'vala ta gbí òkò tí yo nìkì maa go có mì Bìndi-Mbírì tí Jézù,

⁶ tacó wàa, có gbí muu yo 'dáá gî 'ví dù ká gbaànjé, wàa yo 'ví ùlù Mbírì tí nó tí Bu Mbe tí ndoo Jézù tí Bìndi-Mbírì nó ta kòcò yo toko gbaànjé.

Banga-Ngú-Có tacó tí ndâ 'duù ñinó náa ndú me ndâ Ìzìrìyélì lá nô

⁷ Yo te wìrì mítí yo gbí òkò tí yo, go bà te wìrì mì Bìndi-Mbírì mítí yo, tacó bà ùlù Mbírì.

⁸ Tacó ye kû 'dè có jì yo máa, Bìndi-Mbírì táánò gì tí bòò mì ndâ 'duù mì ndâ Ìzìrìyélì ñinó mbe ya gí gbí gàzâ gî nó, tacó bà tùbà yúcó mì Mbírì, tacó bà tùbà máa, cí tí nó náa Mbírì táánò ci ta ndâ ká gù ndâ Ìzìrìyélì nó a yúcó.

⁹ Yí gì delè tacó wàa ndâ 'duù ñinó ta ña ndú me ndâ Ìzìrìyélì lá nó 'ví ùlù Mbírì gítí nambeè mì wó, á go có tí nó náa à cu mí gbí wáràgà mì Mbírì máa,

«À má éno, ye bà ùlù ɾè lo tí Mbírì mí gbí òkò tí ndâ 'duù

ñinó ta ña ndú me ndâ Ìzìrìyélì lá;

ye bà be ɾè lo gbí cè,» nô.

¹⁰ À gì cu 'bí káká'i máa,

«Yo tí ndâ 'duù ñìnó ta ña yo me ndâ Ìzìrìyèlì lá
 nó
 'dáá gî 'ví dùlù tí yo toko ta ndâ 'duù mì wó.»

11 À gùì cu 'bí máa,

«Yo tí ndâ 'duù ñìnó náa ña yo me ndâ Ìzìrìyèlì
 lá nó
 'dáá gî 'ví ùlù Mbírì;
 wàa, ndâ 'duù 'dáá gî 'ví ùlù yí.»

12 Káa kòcò Ìzáyà máa,

«'Vii-gù Jésì kèjì,
 yí bà gì tí gba mbe zogo ndâ 'duù
 ñìnó ta ña ndú me ndâ Ìzìrìyèlì lá nò,
 ndâ 'duù ñìnó ta ña ndú me ndâ Ìzìrìyèlì lá
 nó
 'ví koṛo có lì a i mítí wó.»

13 Ye kù 'deke tí ye máa, Mbírì tí nó náa yo kù
 koṛo có lì mítí wó nó, 'ví je líkí'o jì yo tókà'i, yí
 delè 'ví je 'dê njembí jì yo 'do gbí có bà ùnje mì
 yo, tacó wàa, wotí mì Bèrì-mì-Mbírì 'ví sì yo 'ví
 koṛo có lì mítí Mbírì.

*Nderè bà cu wàràgà tí nó mì Páwòlò ta gúku
 tí wó wálá*

14 Ye ñò ni ngbàrángà'i gî, ndâ ná'vindí, máa,
 yo a ndâ tó 'duù ngé ndii gî, yo delè a ndâ 'duù
 ta muu tí yo me gbolò, ta wotí bà ñìbà i gbí òkò
 tí yo kuu tí yo.

15 Káa ye kù cu wàràgà tí nó jì yo ta gúku tí
 ye wálá, tacó bà 'va mbí yo gítí ndâ 'bí i, tacó
 nambeè tí nó náa Mbírì bàkà jì ye,

16 ta bà bàkà ye tí mbe bàkà nèté mì Bindi-
 Mbírì tí Jézù, tí bu-Mbírì mbe kù ma Banga-Ngú-
 Có mì Mbírì jì ndâ 'duù ñìnó náa ndú me ndâ

Ìzìrìyèlì lá nó, tacó wàa, Mbírì 'ví lì ta 'bì wó gí tà i-cí-ci mì ndâ 'duù ònó náa ndú me ndâ Ìzìrìyèlì lá, náa Bèrì-mì-Mbírì bàkà tí ngbàrángà'i gí nò.

¹⁷ Ye kù mòò ọọ ye gbí nèté mì ye náa ye kù bàkà tacó tí Mbírì nó ta ẹ̀rè mì Bìndi-Mbírì tí Jézù.

¹⁸ Tacó ye bà yaka 'bì ye yee gbí 've ta bà 'dè 'bí tende có wálá, ye bà 'dè có ká gítí bà bàkà ye mì Bìndi-Mbírì tí mbe bàkà ndâ 'duù ònó náa ndú me ndâ Ìzìrìyèlì lá, mbe 'di có mì Mbírì lá nó, tí ndâ mbe 'di có mì Mbírì, ta nje ye, delè ta cè bà bàkà i mì ye,

¹⁹ ta ndâ wotí mì ndâ kpo-kpò i-serè náa ye bàkà ndú, ta wotí mì Bèrì-mì-Mbírì. Tacó éno, ye ma Banga-Ngú-Có mì Bìndi-Mbírì ta kábà 'do Jèrùzàlémè di gbí ndâ to Ìlìrìkù.

²⁰ À gbí njembí ye ta o 'dáá gí a go bà ma Banga-Ngú-Có gbí ndâ to ònó náa ndâ 'duù kà jé 'di ẹ̀rè Bìndi-Mbírì gí nó lá, tacó wàa ye 'ví bì 'bá mí pí tà 'bá ònó náa 'bí 'duù sè sàà kùro gí nò lá,

²¹ á go có tí nó náa à cu mí gbí wáràgà mì Mbírì máa,

«Ndâ 'duù tí nó náa à jé 'dé có tí wó jì ndú lá nó bà ọ̀yí.

Káa ndâ 'duù tí nó jé mbe 'di có tí wó lá nó bà 'di gbí có mì wó» nò.

Có bà co wìrì ya gí Rómà kuu gbí muu Páwòlò

²² Ònò a i tí nó mbe kù tii ye cóó-cóó 'do tí bà ya gí mì yo kà nò.

²³ Káa nèté mì ye gbí ndâ to tí nó káá nó lê kpónó wálá, ye lê bàkà có bà ya gí mì yo kà ta mbè ndoò,

24 káa ye kpónó kù koṛo có bà có mì yo Rómà kà ta o bà ya ye gí Ìsìpàniyà, ye má zò i-wiri mì yo gàà gî, yo 'ví konì ye muu nó mì ye gí kùṛo kà.

25 Káa ye kpónó kù ya a i gí Jèrùzàlémè ta ndâ i-bà-konì-tí ji ndâ 'duù mì Mbírì kà má kózò gi.

26 Tacó a ndâ mbe kù kili ta ṛè mì Bìndi-Mbírì gbí ndâ to Mèsìdóniyà ta ndâ to Àkáyà ká tuu ye ta ndâ i-nambee náa ndú kili 'do gbí 'dóo nambee mì ndú, máa, ye ya tí ji ndâ mbe yê gbí òkò tí ndâ 'duù mì Mbírì gbí gbata Jèrùzàlémè.

27 Ndú bàkà éno ta pétékè tàkòcò ndú, káa à má ta bà 'dè ta yúco, i mì ndâ Ìzìriyèlì kuu muu ndú. Tacó ndâ 'duù tí nó náa ndú me ndâ Ìzìriyèlì lá nó kpónó má kù gbo gbí ndâ i-nambee mì Mbírì ta ndâ Ìzìriyèlì, kózò tí ndú delè bà konì ndâ Ìzìriyèlì ta ndâ i muu to tí nò.

28 Ye má ya ta i tí nó náa à tuu ta ye nó ji ndâ mbe gî, ye bà ya gí Ìsìpàniyà có mì yo kà;

29 káa ye ṛò ni gî máa, ta o tí nó náa ye bà yee mì yo kà nó, ye bà yee ji yo ta ndâ tó i me gbolò 'do mì Bìndi-Mbírì.

30 Ye kù 'deke tí ye ji yo, ta ṛè mì Mbe tí ndoo Jézù tí Bìndi-Mbírì, delè ta ṛè mì Bèri-mì-Mbírì tí mbe zè yo nìkì ma, ndâ ná'vindí máa ndoo 'deke tí ndoo tí kpoò ji Mbírì, tacó wàa, yí 'ví konì ye gbí nètè mì ye.

31 Yo 'deke tí yo ji Mbírì tacó tí ye, máa, yí 'ví si ndâ mbe ùnje gítì Bìndi-Mbírì lá 'bá mì ndâ Ìzìriyèlì 'ví dooko gítì ye ta vò i lá, delè tacó wàa, ndâ 'duù mì Mbírì gbí gbata Jèrùzàlémè 'ví ù ta nje gítì ndâ nètè mì ye.

³² Bìndi ye 'ví ya gí mì yo ká ta pétékè tàkòcò ye gí bà tè wó ye mí mì yo kà, náa Mbíri má je nó jì ye gí nò.

³³ Mbíri tí mbe 'dê njembí 'ví dù ta yo 'dáá gí. Go-i-tí-nò.

16

Páwòlò 'vee ndâ 'duù Rómà

¹ Ye kù ùlù námì ndoo tí Fòyébè jì yo; yí a mbe konì ndâ mbe kù kili ta ɾè mì Bìndi-Mbíri gbí gbata Kèngèréyè.

² Yo te wíri mítí wó ta ɾè mì Mbe tí ndoo go bà te wíri mítí ndâ 'duù mì Mbíri. Yo konì yí ta ndâ 'bí ɲa i ɲinó mbe nìkì tí wó, tacó yí konì ndâ 'duù me mbè, à kpêtí káa 'dóó ye nó, yí delè konì ye gí.

³ Ye 'vee ndâ Pìrisíla ta Àkùyíla, tí ndâ ka ye mbe bàkà nètè mì Bìndi-Mbíri tí Jézù,

⁴ ndú táánò pà ku gítí ndú ta ɾè ye; ze ta ndâ 'duù ɲinó ta ɲa ndú me ndâ Jùdéyà lá mbe kù kili ta ɾè mì Bìndi-Mbíri nó 'dáá gí, 'dè nìkì maa jì ndú.

⁵ Ye 'vee ndâ mbe kù kili ta ɾè mì Bìndi-Mbíri á mí 'bá mì ndâ Pìrisíla ta Àkùyíla.

Ye 'vee tó 'duù mì ye Èpàyìnétù tí kpédélé 'duù mbe gí tí 'duù mì Bìndi-Mbíri gbí to Ásiyà.

⁶ Ye 'vee Màriyà tí mbe kù bàkà nètè tí kpoò gbí òkò tí yo.

⁷ Ye 'vee ndâ Àndòròníkò ta Jóniyà tí ndâ nambe ye ndâ Jùdéyà, delè tí ndâ ka ye náa ze táánò ta ndú gbí zàà; ndú a ndâ 'duù ɲinó náa ndâ 'duù ɲò ndú ni ngbárángà'i gbí òkò tí ndâ

mbe kù mì Bìndi-Mbírì gî; a ndú delè ká gí tí ndâ 'duù mì Bìndi-Mbírì á kùro jì ye.

⁸ Ye 'vee Àmbìliyátù tí tó 'duù mì ye ta rẹ̀ mì Bìndi-Mbírì.

⁹ Ye 'vee Ùrùbànò tí ka ndoo mbe kù bàkà nèté ta rẹ̀ mì Bìndi-Mbírì. Ye delè 'vee tó 'duù mì ye Ìsitáki.

¹⁰ Ye 'vee Àpélè tí mbe kù bàkà nèté mì Bìndi-Mbírì ta njembí wó gbaànjé ngé ma.

Ye 'vee ndâ 'duù 'bá mì Àrìsitòbúlù ngé ma.

¹¹ Ye 'vee Èròdìyónà tí nambe ye. Ye 'vee ndâ Nàrikísù, ta nawù wó, ta ndâ 'viì mì ndú, ta rẹ̀ mì Bìndi-Mbírì.

¹² Ye 'vee ndâ niì tí nó ta rẹ̀ ndú a ndâ Tìrífósà ta Tìrífénà tí ndâ mbe kù bàkà nèté ta rẹ̀ mì Mbe tí ndoo nô. Ye delè gii 'vee tó 'duù mì ye tí niì tí nó tí Pèrìsì tí mbe bàkà nèté tí kpoò ta rẹ̀ mì Mbe tí ndoo nô.

¹³ Ye 'vee Rúfò tí gbolò mbe nèté mì Mbe tí ndoo. Ye delè 'vee nawu Rúfò tí mbe tègàrà ye ká go 'dóó 'viì mì wó.

¹⁴ Ye 'vee ndâ Àsìngìrítù, ta Fèlègònì, ta Èrèmésì, ta Pàtòróbà, ta Èrémà, ta ndâ ná'vindí nìnó mbe kù dù ta ndú kà.

¹⁵ Ye 'vee ndâ Filòlógu, ta Júliyà, ta ndâ Nèrèwù, ta námì wó, ta Òlím̀bà, ta ndâ mbe kù kili ta rẹ̀ mì Bìndi-Mbírì á mì ndú kà.

¹⁶ Yo 'vee tí yo gbí òkò tí yo ta bà òlò gbí tù yo go i mì ndâ ná'vindí.

Ndâ mbe kù kili ta rẹ̀ mì Bìndi-Mbírì mì ze kàá 'vee yo.

Ndòngbú có mì Páwòlò jì ndâ 'duù Rómà

17 Ye kù 'deke tí ye ji yo, ndâ ná'vindí, máa, yo kpolo ro yo mítí ndâ mbe kù njèè gbí òkò tí yo ta bà ònòkò muu yo 'do tí yúco tí nó náa à nìbà ji yo nó gî, yo mò tí yo 'do tí ndú gî.

18 Tacó ndâ mbe bàkà ña i tí nò kù bàkà me nèté mì Mbe tí ndoo Jézù tí Bìndi-Mbíri lá, ndú kù bàkà káa 'dóó ndâ i mì ndú mbe nìkì tí ndú; ndú kù eendi ndâ 'duù ñinó ta muu ndú me nji' dí nó ta banga nje, ta bà toro bàà mítí có.

19 Káa ndâ 'duù 'dáá gî 'di tàwo bà zèè Banga- Ngú-Có mì yo ta njembí yo gbaànjé gî. Tacó éno, tàkòcò ye peteke gítí yo ngé ndii gî. Có gbí njembí ye éno máa, muu yo 'ví dù ta o 'dáá gî ká gítí i ñinó dú nô, wàa có mì yo 'ví dù ta vò i wálá.

20 Mbíri tí mbe 'dê njembí bà si yo 'ví 'dò Gba-wàtà mí to ta kò yo. Mbe tí ndoo Jézù tí Bìndi-Mbíri 'ví cù 'dê ngo cù wó mítí yo.

21 Tìmatéyò tí ka ye mbe nèté 'vee yo ngé ma. Ndâ Lúciyò, ta Jàsónì, gii je Sòsìpàterè, tí ndâ nambe ye, delè 'vee yo ngé ndii gî.

22 Ye tí Tèrètíyò, tí mbe kù cu wáràgà tí nó tacó tí Páwòlò, kù 'vee yo ta rẹ̀ mì Mbe tí ndoo.

23 Gáyù tí 'duù tí nó náa ye kpónó kù dù a i 'bá mì wó nó, delè náa ndâ mbe kù kili ta rẹ̀ mì Bìndi-Mbíri kù kili mí 'bá mì wó nó, 'vee yo ngé ma.

Èrásitù tí mbe kù kpolo tí ndâ i-míri gbí gbata, ta ná'vindí ndoo Kùwàritò 'vee yo. (

24 Ye kù 'deke tí ye máa, Mbe tí ndoo Jézù tí Bìndi-Mbíri 'ví cù 'dê ngo cù wó á mítí yo 'dáá gî. Go-i-tí-nò)

Páwòlò ùlù Mbíri ta bà 'deke tí wó

²⁵ À ùlù Mbírì! Wotí bà je wotí bà tee njembí yo mítí Mbe tí ndoo tí kpoè ji yo go Banga-Ngú-Có mì ye náa ye kù ma tí có gítí Jézù tí Bìndi-Mbírì nó, kuu tí wó. Có tí nò gbí ndâ ká o táánò sàà a có kóó.

²⁶ Káa à kpónó 'dè gbí á gí sè gî. A ndâ mbe 'dòkò có mì Mbírì ká cu có tí nò mí gbí ndâ wáràgà mì ndú, náa à kpónó kù ma ji ndâ 'duù muu to tí nó 'dáá gî, a go có mì Mbírì tí nó mbe kù 'vala ká dúú bà ya tí nò. Tacó wàa, ndâ 'duù 'dáá gî 'ví tee njembí ndú mítí Bìndi-Mbírì, ndú delè 'ví 'di ta có mì wó.

²⁷ À ùlù Mbírì tí gbèe mbe 'di gbí-o dúú bà ya tí ta rẹ̀ mì Jézù tí Bìndi-Mbírì. Go-i-tí-nò.

Ndogo
Ndogo: Ngú bà toko nambeè mî Mbîrî ta ndâ 'duù
New Testament

copyright © 2001 Wycliffe Bible Translators, Inc.

Language: Ndogo

Contributor: Wycliffe Bible Translators, Inc.

All rights reserved.

2025-05-16

PDF generated using Haiola and XeLaTeX on 16 May 2025 from source
files dated 16 May 2025

14424ae9-b5af-591e-814e-49316d8d74aa